

封表卷之十

逝者已矣傳之炳如或封其墓或表其間用示
旌揚風爾里居行人拜道過客式廬思哀思敬
遺澤匪虛志封表

冢墓

鄭康成曰冢封土爲邱壠墓孝子所思慕地也
抑聞服氏曰王公爲邱諸臣曰封庶人不封不
樹其等則自有間矣顧依古以來若堂若斧者
何限纍纍黃土蕭蕭白楊能盡識爲誰何也哉

獨有人焉呼之欲出知其繫思者遠也邑中如
羅將軍墓已入古蹟中至五代梁王宋楊七郎
墓今皆隸寧河姑弗深考自元劉元帥以下所
以得傳者非功名顯著卽德澤在人不少虛耳若
夫德門衍慶佳域兆祥乃以一隅比於繞電流
虹之地斯尤千秋地運之隆非偶然已也

元

劉元帥墓

爲中書行省左丞諱深之墓在
縣西八里石獸碑碣尚有存者

明

蔡指揮墓

爲都指揮僉事諱完者不花之墓在縣南劉各莊碑碣亦如故

朱參政墓

爲參政諱德之墓在縣西南十八里石獸碑碣具存

芮都御史墓

爲左都御史諱釗之墓在縣東北一里有論祭碑文二道見藝文

按自元迄明垂四百年而墓之所傳者僅四人

耳豈有幸有不幸歟當時則榮沒則已焉若此

者不可勝道也惟可傳者少而其人亦彌可知矣

國朝

承恩公墓

在縣西南二十里

皇太后祖承恩公諱吳祿之阡乾隆元年

特遣官致祭建寢園立

御製碑文二道

按自寢園既建相地者過之輒詫曰氣佳哉鬱鬱蔥蔥然宜其後之大也然當其卜葬時曷知

今日事

哉伏讀

御製文稱其賦性樸誠詒謀忠孝乃

知積累之深其發祥有以也

杜大學士墓

在寧河縣界贈翁諱守禮居士
穴大學士諱立德卽葬其西有

諭祭碑文見藝文志

按茲志凡地之歸寧河者皆不載而猶載杜文
端墓者以文端世居寶坻城今子姓胥在境不
得以墓居分縣而隔絕之也若謂爲邑中極品
而存之則人之傳否自有在耳應運
興朝策名政府豈惟其位云爾哉

劉大司馬墓

在縣東南豐臺鎮之西一里
許爲兵部尚書諱兆麒之阡

諭祭碑文亦見
藝文志

坊表

說文坊邑里名所謂坊廂者是而後之旌賢者
輒號爲坊其取諸禮所云言坊行表者歟抑坊
者方也將以爲一方之表云爾叔孫穆子有言
不朽者三苟無一焉何表之與有標題在一時
矜式在後世非徒目曉之榮也望重縉紳芳流
閨闈扶獎人倫端藉是矣爲分列於後使各有
考焉

以仕宦著者凡有六

繡衣坊二

一爲御史王傅立
一爲御史魏景釗立

都憲坊

為都御史
芮釗立

司徒大夫坊

為郎中芮
元進立

司諫坊

為給事中
高敏學立

恩榮坊

為知縣芮
元介立

以科第著者凡二十九為進士十一為舉人

進士坊

為進士
芮釗立

恩榮坊

為進士
牛魯立

朝陽坊

進士坊

俱為進士
薛鳳鳴立

折桂坊

恩榮坊

俱為進士
劉儒立

恩榮坊

為進士郝
鳴陰立

甲第重光坊

為進士苑
時葵立

恩榮坊

為進士
龐淳立

解元坊

為解元
王鏗立

折桂坊

為舉人
薄弘立

鵬舉坊 為舉人 王翺立

奎光坊 為舉人 劉天爵立

世芳坊 為舉人 呂循矩立

世科坊 為舉人 呂元進立

登雲坊 為舉人 呂欽立

步蟾坊 為舉人 孫鯨立

棣秀坊 為亞魁 牛逸立

秋光坊 為舉人 邳贊立

恩榮坊 為舉人 劉泰吉立

其仕宦科第之萃于一門者又有四

祖孫濟美坊 為都憲 芮釗舉 人芮元采立

父子登科坊 為進士 苑蕃舉 人苑時蕃立

兄弟登科坊 為進士 牛魯舉 人牛逸立

祖孫父子兄弟花封坊
為知縣芮元采芮質成芮質田芮昌齡立

以孝著者二

孝子坊
為張改立

孝子坊
為生員劉遠立

女之以貞節著者十有一一曰貞烈二曰恩榮

其八皆曰節孝

貞烈坊
為郝經妻褚氏立

恩榮坊
為芮崙妻趙氏立

恩榮坊
為張元鼎妻劉氏立

節孝坊
為郝應聘妻芮氏立

節孝坊
為苑固妻劉氏立

節孝坊
為苑弘祖妻陳氏立

節孝坊
為牛文輝妻芮氏立

節孝坊

為杜恭璠妻王氏立

節孝坊

為芮鉉妻孫氏立

節孝坊

為張天爵妻曹氏立

節孝坊

為芮昌申妻張氏立

外有二節孝坊為杜立言妻張氏常懷遠妻張氏立者今歸寧河縣

近奉

憲建立者一凡邑中有懿行則標之

彰善坊

已詳獎民人毛成旺

附 祠堂

冢有碑坊有額猶古者封墓表閭之意也若夫循吏掛冠貞魂返土弔其墓遙矣訪其閭渺矣朱邑未葬於桐鄉曹娥竟投於江浪思慕之心

烏能已哉于是有祠以祀之祠也者封表之大
者也雖歷時既久寂寞荒涼而其人之一沒如
一昔焉猶將薦蘋藻而愴惻也夫

名宦祠

鄉賢祠

並見學宮

忠義祠

節孝祠

並見祀典

莊公去思祠

昔在仁賢街爲
明知縣莊禱立

袁公去思祠

昔在西門外爲
明知縣袁黃立祠
宇久廢乾隆七年
知縣洪肇楨重

封表

建為文以祭請學憲
錢公陳羣書額

史公去思祠

昔亦在西門外為
明知縣史應聘立

萬公去思祠

向在廣濟寺西為
國朝知縣萬全立

毛公去思祠

向在西門內為
國朝毛士儀立

三烈女祠

在文昌閣北為明嘉靖時
二李氏一劉氏三烈女立

論曰勸旌之典自上操之品題之公自下定之

公論昭斯盛典錫欲倖邀也得乎是以豐碑篆

額歷歷標題曰某邱某名賢之所葬也某里某

先達之所居也至言及孝子烈女尤相與低徊

憑弔想見其生平彼自有所以不朽者耳不然
滄桑代變陵谷時移富貴而名磨滅者幾何也
獨傳此哉以後之傳緬前之烈有志者可以興
矣此余志封表意也其附祠宇於卷末者謂清
風貞節久而彌芳顧此一椽如拜一坏土矣噫
九原如可作也微斯人其誰與歸

封表卷之十終

人物上卷之十一

地以人重名爲寶寶流傳千古敢忘其真循良
遺愛先進芳塵音容雖渺俎豆如新言念君子
典型是循志人物上

名宦

親民之職詎不難哉古之仕者衆矣顧所居而
化所去而思者卒寥寥焉以此信斯民之直道
而行也寶邑名宦起後唐至今止四十人其人
之生平亦多無可考者要於此地實有遺愛焉

愛斯慕慕斯傳矣不然彼都所豔於此曾無損益也安在其繫思不置耶

後唐

趙德鈞幽州人有勇力好權畧從劉守光爲軍校守光未之奇也歸莊宗乃大奇之賜姓名曰李紹斌初莊宗遣大將周德威攻拔蘆臺軍進克燕城執守光以歸同光中以德鈞鎮蘆臺遂因鹵地置鹽場又舟行別置新倉以貯之開渠運漕資鹽瀛莫間資其利用是饒行雄於一方

明宗時以其子延壽尚公主尤厚遇之在鎮十年常敗契丹兵執其將赫邈威名甚著及廢帝弑鄂王自立石敬瑭故明宗婿也乞契丹助以攻唐廢帝詔德鈞爲諸道行營都統而德鈞亦有援契丹自立意敬瑭因遣桑維翰以厚利啖契丹契丹寄語德鈞曰吾已許石郎矣敬瑭篡契丹遂拔德鈞父子歸居久之竟鬱鬱而終其後延壽卒以遺兵滅晉封燕王 贊曰德鈞受唐厚恩不思竭力捍難而轉欲效敬瑭所爲何

其謬也然廢帝本以異姓篡宗德鈞既耻爲之
用又素不屑居敬塘下則發憤爲雄亦五代諸
君之故態耳幸則爲敬塘不幸則爲德鈞德鈞
豈遜敬塘哉若夫坐鎮蘆臺擁團通運是方富
庶由此而開言名宦者所以必首列之也

金

王禕大定中爲振威將軍世宗十一年東巡過
新倉見其人烟繁盛詔改爲縣明年析香河近
民附焉時方草創擇尹難其人乃命禕至從

容經理之以次就緒相地渠水陽大覺寺西卜
爲縣署其東爲丞尉廨吏民間令踴躍從事樂
其與境內更始也再期卽叙崇閔壯麗畿內諸
官署罕出其右者邑之規制於是畧備矣具見
劉晞顏記中

蒙括特末也大定時爲寶坻尉卅宗嘗謂宰執
曰朕聞寶坻尉蒙括特末也清廉其爲政何如
左丞幹特刺對曰其部民亦稱譽之不知所稱
何事上曰居官但清廉足矣安所得全才哉命

進一階語見世宗本紀中補贊曰當王昶修縣

治後劉踰顏曾為之記踰顏蓋其時著作手也

舊志乃列名縣令訛矣及按金紀有蒙括特末

也者清廉之名上動君相非所謂循吏者耶而

不之及又何踈也一去之一補之蓋不欲以

訛且踈者貽誤後來云

元

黑廝彥明本懷慶路錄事判官也於至正十年

來監是邑時世祖垂定江南方崇文教禮名儒

以風厲天下彥明至境首謁聖廟見舊宇就圯
銳然議新之捐俸五百緡爲倡自大成殿東西
廡及講堂齋舍以次繕修有嚴有翼邑人悉遣
子弟詣學絃誦琅然文風乃振 贊曰元世祖
卽位尊禮姚樞許衡諸儒行釋奠之儀定崇祀
之制文治光焉是以一時循良知所先務觀於
彥明想見當時之所尙矣明人訛詆失真至謂
九儒十句由世祖開國使然不亦誣乎

明

荆志洪武三年知縣事時去大將軍徐達克元
都纔二年耳兵戈初定城郭蕭條志鳩集離散
咸與維新已乃大興學校投牒上官請增廣生
員優其廩餼是年太祖詔選文學貢於成均寶
邑貢士之盛視他邑爲最

柳青志同時丞也與志相得甚歡志所設施必
力贊之自文廟外凡社稷山川壇以及廨舍無
不修整其時令佐皆賢政平訟清境內大治

何文信洪武七年知縣也先是荆志旣修文廟

猶缺射圃會詔令學宮舉行射禮文信乃於廟
右闢地爲圃周繚以垣并構亭其內率諸生而
告以古者觀德之意作射圃記 贊曰化民成
俗必由乎學學者致治之本也故文翁化蜀千
古美之一切所爲皆末耳如三賢者其聞文翁
之風而興焉者乎荆柳同心以襄上治四年而
後復得文信繼之知爾時絃誦之聲達於四境
矣於乎盛哉

陳讓山陽人天順進士以成化元年之官精明

果銳令行禁止豪右無敢犯者在縣多所興舉
於學宮則修明倫堂設兩角門樹露臺於縣治
則築城垣甃東西門以磚建鼓樓一時境內煥
然改觀多前此所未有者後累陞杭州知府
葉琪讓同邑進士也讓旣膺上考琪適繼之成
化五年以御史出知縣事初不尙刻覈而豪強
斂跡盜賊屏息興學校勸農桑士民胥感佩之
一時有兩山陽之號尋擢山東按察司僉事累
官戶部尙書進少保

彭鎬寶雞人成化十年以國子生之任其政聲
與陳葉相埒時公署漫漶鎬力修之又建後堂
於其內曾於西門官路徧栽柳以便行者後人
過之猶攀條歎息曰此彭侯植也

袁昂忻州人亦成化時知縣也本山右名孝廉
以經術爲吏治曰嘗不失書生本色耳仁民愛
物政簡刑清不爲赫赫表暴之行而民自懷之
武尙信徽州人成化間舉於鄉以弘治九年之
任甫下車謁聖廟仰而歎曰廟以祀吾師孔子

學以養吾師孔子之徒也觀瞻不肅吾將誰師
越明年政通人和乃倡邑人創齋房及省牲所
砌丹墀修櫺星門學制一新士氣鼓舞咸頌武
侯果能以先師之教教其民也乞學士費公宏
爲之記

莊釋字誠之武進人學高才贍素以經濟自負
登弘治丙辰進士及戊午之官視民事如家事
薙奸植良寬猛交濟寶邑向惟土城明興已百
四十年未之有改釋巡城太息謂焉有近畿甸

當邊衝而若渠邱城惡者哉力白於都憲洪公
請改築公聽之乃倡邑之好義者協力以助輦
石運磚伐材鎔鐵及耜而竣名曰拱都屹然爲
畿東保障迨正德辛未流賊內訌率衆至城下
攻之不克卒以無虞者本公建城之力也他若
設津渡置義冢凡可以便民者無不爲卽邑之
有志亦自釋始以報最擢去邑人爲立祠至今
思慕焉後累官至參政 贊曰公之修城記云
度地分工民樂趨事八日而土城立十三日而

磚城完噫嘻亦神速矣哉及讀吳公儼文乃知
舉百年廢墜於期月之間而又厲不及民者匪
獨其才大過人亦爲國之公有以鼓動於人心
而不自知也抑吳公又曰微都憲能用誠之則
誠之雖欲自用以成斯役亦不可得信夫動大
衆成大功君子蓋重言之矣

陳文滔莆田人進士弘治間知縣舊志云天性
骨鯁政事通達 贊曰文滔政績無可考然曰
骨鯁則有守曰通達則有爲固聖門果達之選

也於弘治朝與武莊兩賢並稱名宦先民豈有阿焉

汪琦興化人舉人弘治間教諭常集諸生訓誨不倦師範嶷然於人材多所造就終明世教職得與於名宦者祇三人琦其首也

周在太倉人進士正德間知縣事清風峻節疾惡如讐時中官錢寧勢張甚畿內諸達官事之惟謹而在獨擯不與通又發其所善私事聞於刑部刑部捕鞠之寧怒教伊家訟寃詞連在逮

付法司而其人竟釋歸以御史張士隆疏覆案
在得還職直聲動天下然愈觸寧怒嗾其黨論
士隆庇在治獄不平復與士隆同下詔獄及寧
敗乃起官歷陞副使補

楚書寧夏人進士嘉靖初知縣事夙負長才其
治邑如烹小鮮耳始立名宦鄉賢祠於學官祠
成率邑之縉紳設主致祭意在風厲官方激揚
士氣非徒爲一時計也政成登上考仕至巡撫
都御史

武德智館陶人由鄉進士令原武有善政以嘉

靖十四年薦移知寶坻政平事練民有前武謂

信

後武之稱猶漢代之呼大小馮君也先時邑

令莊禪旣濬內河河自西鄆入城由學東繞文

明橋西注稍南流出禪欲於河之南闢路建橋

以滙地脉會內召不果後遂無議及者至是乃

闢路於橋星門前曰雲路其橋曰升僊橋曰吾

以繼前賢志也嗣後邑文風果日盛數年擢知

州

孫惟謙富平人嘉靖中以選貢入大學大司成
涇野呂公深器之刊其禮經文爲諸生式名噪
六堂戊申除縣事節儉清平不事粉飾而民已
陰受其德以直道忤時歸士民遮道泣留相隨
數十里惟謙慰藉之乃去後邑人思慕不已作
詩文以紀其績彙爲去思集又建祠合莊禪楚
書武德智祀之號四君子祠

唐鍊字溪南常德人進士於嘉靖中知縣事殫
心利弊夙夜匪懈自莊公禪建設城池以來奄

忽百年矣至是鍊乃倡衆修濬增城二尺許池
浚丈有二廣倍之建敵樓易水關以鐵時人有
保障千年功不泯父歌莊叟母歌唐之頌繼復
大新學宮設義學於四鄉更力陳百姓疾苦省
里甲裁驛役百年積困爲之一蕪民甚德之邑
志久不修續上下二卷雖簡約大要畢舉自明
嘉靖以上其事跡僅有存者猶以此本故也補
陳碩廣東人嘉靖間由舉人任訓導學問淵邃
有就正者叩之不窮疊疊提撕皆古人進德修

業要旨後擢國子助教陞松江通判

楊時泰乾州人太學生亦於嘉靖中任教諭昔
菴齋中日手一編長吟不輟時進諸生而勗勵
之意懇如也人以為不愧師儒有陳楊二先生
之目

袁黃字了凡嘉善籍吳江人登萬歷丙戌進士
少善楊復所為良知之學其文亦以圓悟為宗
戊子夏知縣事是年雨多河溢民大饑市間薪
粒俱絕而索逋賦者猶不休民不聊生黃惻然

憫之至卽借俸以償所全活甚衆又其時民苦浮賦黃請免以萬計他若庫子厰夫皇木車花板石及貢銀魚諸費不下數千黃力爲民請命悉議罷去雖忤上官不恤也潞王之國供億不貲黃委曲調劑事集而民不勞邑之三岔口剗水逆入爲災前令丁應詔槌石堵之剗民弗便也議復開黃以官爭卒得寢當下車時卽爲文祭神以十四事約已而年歲果稔遇旱潦禱輒應每斷囚諭以福善禍淫之說囚爲感泣一夕

獄墻圯囚無逸者其感神格人多此類也常刊
勸農書水利說數千言之具有成效及辛卯
西夏朝鮮相繼用兵黃條上方畧廷臣交薦擢
司馬郎將行囊橐蕭然惟圖書數車而已送者
皆爲掩泣後累官至太常卿 贊曰余至寶坻
每聞民間稱述先生莅任時事津津焉如將見
之者旣讀其勸農水利諸書委曲周詳入人肺
腑宜民之歷久而不諼也世特以講學近禪爲
先生詬厲嗟嗟政績則安可沒哉腐儒刻繩古

人及得尺寸柄直如面牆彼其所學者何也虬
蟬撼樹直姑聽之而此邦獨尸祝至今先生其
可無憾矣

張兆元字蓮汀烏程人貢生萬歷壬辰以永平
通判攝邑篆當是時遼左方警羽檄交馳徵發
無虛日兆元調停區處上下賴之遇歲饑請蠲
逋賦累千省里甲停撥馬減更夫時薊州人投
牒中執法希復開三岔口以毀前令績兆元力
陳不可議乃止在署二年所以恤民者甚至瀕

行行李蕭然猶檢囊中餘五十金置地六頃充
學田以爲寒士薪水助日子空兩袖拂清風歸
耳旣去民懷之刻石以紀其德

補

李景登字瀛洲廣寧人萬歷壬辰進士治犒氏
有聲移任寶坻境內固已想望風采矣及下車
其度溫然其節介然專務拊循其民公庭訟簡
加意作人以七義月試諸生丹黃甲乙雖良師
之課其弟子不是過也於學宮創尊經閣開登
瀛書院一時才雋畢出後捐俸修城隍廟祝云

予無瀆於神神尙祐民在治數年風清俗美累
陞漢中知府

史應聘河內人進士於天啓季知縣事時明政
不綱關寺流毒應聘知天下將亂一意惠懷其
民合境戴之及崇禎二年冬

大清兵北上良鄉香河灤州遵化俱失應聘乃集士
民諭以固守城外鉦聲動天飛礮震地而應聘
登陴指畫意氣自如攻之不克解圍去城卒以
全事聞晉給事中

趙國鼎樂平人鄉試第一成進士知寶坻縣事
未幾

大軍猝臨時屢經被兵城郭未繕外無虵蟊蟻子之
援或言邑小無兵盍姑避國鼎毅然曰吾守土
吏也去將安之乃諭士民爲守禦計誓必死守
久救不至國鼎抽刀曰事迫矣可奈何死耳諸
君勉之衆皆泣曰願從死及城破國鼎被執脅
降之卒不屈顧謂主簿樊樞典史張六師訓導
趙士秀曰努力無失節諸人皆曰公死敢不徇

皆見殺時崇禎九年七月也贈卹如制畧見明
史忠義王肇坤傳補贊曰食人之祿者死人之
事爲臣之通義也我

聖祖仁皇帝開設史館

諭爲明死事諸臣紀事罔有所隱迨經我

皇上欽定史乃告成如趙鼎者亦得附見於王肇
坤傳此固千古忠臣義士所共爲感泣者也嗟
嗟宋史不載夫韓通明典僅加於余闕孰有如
我

朝之崇獎忠義不遺末秩者哉嘗讀忠義傳題曰

太祖

太宗忠厚開基嘉張銓之守義釋張春而加禮量同天地仁冠古今所由與宋明異矣

高承埏字寓公嘉興人也崇禎己卯舉於鄉明年成進士除遷安令十五年調知寶坻縣自丙子失守後瘡痍未復承埏至急爲民去其不便者如孳生馬料新闢地額以及剝淺船費皆力陳得寢因浚城壕置樓櫓練鄉勇修器械爲預

防計是年冬間警誓衆堅壁清野以待及

大兵至承堦指揮風雪中親以酒食餉守者歷九日
而城中帖然堅不下明年夏復攻之守如故詳
見朱彝尊承堦墓表毛際可高氏詩序中事聞
令優叙爲主選者所抑轉以才力不及調簡知
涇縣後稍遷屯田主事遂引歸避居竹林村未
幾以鬱伊卒 贊曰明季史趙高三人或死或
生其揆一耳史高皆有全城功趙獨不幸被難
豈趙之才遜二公哉國鼎受任未久城邑凋殘

猝無禦備而外援不至卒以身殉傷已承埏鑿於前事日聚邑人而申儆之備具而氣奮故能全也獨怪明季不綱賞罰瞽亂國鼎死守孤城不聞罪不救者承埏勲著矣又爲宵人所厄使忠義之士灰心解體國欲不亡得乎嗚呼誰秉國成若奪之鑑此固天之所以開

聖朝也

王弘祚雲南人崇禎間以舉人秉鐸寶坻舊志云勤學不倦育士有方歷陞戶部尙書 贊曰

弘祚由學博躋上位彼其功業殆有大過人者
耶顧舊志不詳予甚惑焉卽按明史暨明季遺
聞三藩紀事諸編亦祇有永祚而無弘祚終未
識爲何如人他日願更購雲南省志考之

國朝

薛良心遼東人歲貢

世祖章皇帝整兵入關掃除流寇與天下更始而良心
卽以元年授寶坻令當是時百姓轉徙境內空
虛良心能勞來安集之每諭民曰爾曹苦亂離

久矣今

上誕應天命布維新之化是爾曹更生日也繼自今當
父詔兄勉享此太平其敷政一以寬爲本曰民
甫離湯火元氣未易復也百姓由此安堵僉曰
薛公生我明年以政最擢蘓州府同知

孫必茂陝西人

章皇帝延訪人材陝西巡撫以必茂應

詔是時薛良心方超擢乃以必茂知縣事良心之去也
民皇皇若有失慮後無繼者及必茂至寬大惇

裕一如良心所爲民大悅必茂曰薛公治有成
效不可易也惟民未知禮未生其共吾當導以
理學耳每朔望集衆申訓之環聽者莫不歡忭
蓋自明季兵戈蹂躪之餘其不聞此久矣及期
擢衡州府同知

萬全字明宇紅旗人選貢寶坻自薛孫相繼爲
令以養以教漸有起色然薛在任者二年孫止
一年耳至四年聞代者旗人也則惴然而恐以
時方分隸旗丁於境若稍有所左且卧不貼席

矣及全至開誠布公一無偏徇民乃大服全性
醇厚廉謹雅不欲民間有爭訟事每兩造對簿
輒反覆開諭不聽則涕泣隨之卽民之犯法者
亦惻然矜恤勸述陰隲書爲鑑戒或勸說於紂
宇中合境感激呼爲萬佛在治數年勸農桑興
禮讓其名幾掩薛孫以御史內召邑人懷之爲
建生祠後累陞雲南布政 贊曰前有召父後
有杜母循良相繼自古難之况當開國之始哉
是以漢至文帝明至孝宗吏績懋焉其初固寥

寥也惟我

聖朝值明季之陵遲開太平之景運渺茲一邑而四載之中三除賢令豈前代有耶一邑如此天下可知四門穆穆方軌虞廷猗歎盛矣

母鶴慶天津人歲貢任寶坻訓導其之任也適與萬全同歲全方拊循士民而鶴慶復多方訓導與爲應和邑之風教自此開矣明季學官久圯至鶴慶始葺之尋轉教諭陞金鄉知縣

蕭蕙太湖人歲貢以順治十年知縣事之官簡

靜不煩猾吏以其長者稍稍易之蕙乃廉得其
舞文狀置諸法遇縉紳温温謙退或以私干必
力抑之由是奔競路絕邑有工部地最窪下恃
堤以障歲久堤壞邑紳杜立德倡修蕙大發夫
以助之數十年不潰以疾引歸民悵惜焉

歐陽動生安福人進士於康熙八年知縣事賦
性耿介侃侃自將植寒暖抑豪強不市恩亦不
避怨曰吾知有直道耳嘗葺縣治公餘則吟咏
其中蒼茫遙集意洒如也其秦城烟柳北潭秋

月諸什邑人傳誦之去官後謳思不置

牛一象榆林人以先世從龍隸鑲白旗康熙十
一年由蔭生來知縣事爲政務持大體訪累年
積弊革之抑豪右之擾民者從容靜鎮境內帖
然時奉

詔修志一象乃設志館集秉筆者而告之曰宜詳宜
慎勿卒卒爾也適大學士杜立德家居主其事
故邑人謂之杜志 贊曰善哉列子牧馬之喻
云去其害馬者而已去其害而牧馬之道得一

象其知此乎至

本朝邑志實一象修之時以元老家居就訪焉以是邑人呼杜志也然讀一象後序以風土財賦忠孝節義爲諄諄而深慨於修志之難蓋其慎哉及其末猶重懼夫文黛多殘時宜或漏而以補天修月之喻歸諸學士抑何謙讓未遑耶謂是邦文獻之自有屬也固可藉手以告無罪矣苑育蕃雞澤人由舉人任教諭適邑令牛一象修志時也育蕃有文名兼工詩法一象深禮重

之每晤必稱苑先生比修志屬董其事因薦庠
中知名士數人分秉筆焉育蕃爲人沉靜端謹
一時學者奉爲模楷後擢知永寧縣

別楣景陵人康熙進士於二十年之任廉靜慈
愛能以至性化人嘗謂人同此性冥頑者汨其
天耳有以激發其天感斯悔斯改矣於斷獄
時疊疊陳說多叩頭泣謝而去後民間有忿爭
其長老輒諭止之曰奈何負別侯予告歸養百
姓扳轅不忍去

毛士儀秀水籍遂安人世所稱會侯先生際可
之長子也少承家學有盛名浙東呼爲大小毛
公康熙間拔貢以乙亥知縣事鋤暴扶良倡導
風雅令諸生集社次第甲乙之亦時拈題爲式
時會侯老矣迎養於署政暇則載酒肴從其父
出遊倡和爲樂邑人傳爲盛事曾築隄三河艸
橋濠渠寬兒港皆以毛公名擢去爲立生祠
程璇字麓峯益陽人康熙戊戌由舉人知縣事
才識明敏有利必興邑故濱海每遇伏汛雨過

甚卽成巨浸璇每以爲憂巳亥夏大水奉

詔賑饑璇絕不假手吏胥按戶親給民得安堵因巡
行見舊堤就坍督莊民修補之思白上官爲久
遠計會去任不果及雍正丙午

上念頻年畿東苦潦

命 王大臣相度機宜時有薦璇諳水利者令隨往
卽以寶坻堤務委之起三河縣新集料馬莊至
邑之江湟口以次興築嗣濬鮑邱窩頭河二道
以洩境水兼堵塞香河縣七里莊明口日夕不

倦工迄有成 王大臣交薦遂以知府留工先
是魯沽長亭二莊均有水溝與河潮相吐納璇
請改涵洞爲石閘以便瀦洩上憲以費多弗許
璇申請不待報輒舉行叠被詰駁侃侃爭之卒
由京東局報銷其強執如此視工者凡六年鬚
髮盡白及去猶惓惓爲善後計著渠陽水利一
書讀者皆爲感泣

補

伍澤榮字蔭遠祁陽人雍正丁未成進士與璇
皆楚中名宿性耿介不能隨俗俯仰顧存心利

濟惻如也以辛亥之官晤璇於工次璇以渠陽水利說示之喜曰善後當如是矣歸一如璇所言惟新河猶未濬捐公費治之時奉

旨查賑澤榮核實其數無一漏者及畧境內乂安乃平獄訟緩催科以振興文教爲事省俸製 聖

廟祭器講學行禮聚邑中才雋課之指示肯綮文風爲之不變又念邑志久不修開局編纂屬草未定以亢直罷歸人咸惜之其去也泣送者

累累相望設餞凡三十里後合詞請入邑志

補

贊曰方伍公之來程公猶在河上讀水利書序
之豈獨以同里故哉兩賢固心相契也顧程之
功莫大於水利守而弗失斯善矣而伍之興文
造士詎非利民者意中事耶堯箴倡和相濟有
成爲之繼者不亦難乎會予修志邑紳士合詞
以二公請而并稱道及予嗟嗟珠玉在前適滋
之愧耳惟是政績如二公宜他日思慕之所弗
諼也爰存紳士之說於藝文而爲二公補傳以
從民望云

鄉賢

間氣之鍾篤生偉人其人傳斯其地傳所謂地
以人重者非耶是故聲華富貴過也忽焉獨有
歷久而愈芳者彼其賢誠有以信於天下後世
也信於天下後世則并非一鄉所得私而此鄉
之人尤宜俎豆而尸祝之矣况邑爲古泉州自
北魏廢入雍奴千年中人物有混於他邑而莫
可考者所存彌少則其人爲彌可珍而如通州
武清諸志且復強此地之人爲彼有則此數人

者之關係何如也爰自陽球以下謹列其實以
見負重望者之不可假借焉

漢

陽球字方正漁陽泉州人少時結客報母仇由
是知名舉孝廉補尚書侍郎章奏處議常爲臺
閣所崇信九江山賊起連月不解三府上球有
理姦才拜九江太守球到設方畧凶賊殄破遷
平原相後拜尚書令時中常侍王甫曹節等弄
權扇動中外球嘗拊髀歎曰若陽球作司馬

曹子安得容乎會遷司隸校尉王甫休沐里舍
球詣闕謝恩奏甫及子弟爲守令者姦猾縱恣
狀太尉段熲諂附佞倖宜並誅戮於是悉收甫
熲等送洛陽獄球自臨考斃甫父子熲亦自殺
球旣誅甫復欲以次表曹節等權閹聞之莫不
屏氣後反爲節黨所傾故中常侍之禍至於亡
漢云 贊曰除君之惡惟力是視禍福非所計
也當漢靈時中常侍之熾焰矣球能奮不顧身
一朝伏闕奏甫罪而誅之詎非鷹鷂逐雀之義

哉迨後又欲奏曹節不果反殞其身此亦漢之

不幸耳幸而有濟則中常侍之禍息矣又待蕃

武之謀耶范史徒見其杖斃暴屍以為近酷嗚

呼試問所殺者誰也賊豎之是恤以為賢者尤

謬已按球泉州人泉州於魏真君七年廢人雍

奴至金大定中乃復立寶坻縣球固寶坻
人也通州武清
皆收之殊誤

金

馬琪字德玉正隆五年擢進士第為永清令以

治聞累遷戶部員外郎尋轉左司擇使宋國

世宗欲命琪宰臣言其資淺詔特遣之章宗卽位除中都路轉運使時戶部闕官上命宰臣選可任者或舉烏古孫仲和上曰仲和雖有智力恐不能理財顧安得如劉晏者官用足而民不困哉舉琪上然之曰琪不肯欺官亦不肯病民是可用也遂擢爲戶部尙書明昌四年拜參知政事論曰戶部遽難得人無以代卿者故用卿

晚耳一日上謂琪曰卿在省久矣比來事少於往時何也琪曰昔宰職多有異同今情見不向

者甚少上曰往多情見爲是耶今無者爲是耶
琪曰事狀明者不假情見就令情見亦要歸之
是而已五年河決陽武灌封邱而東琪行尙書
省事往治之訖役遷中大夫承安二年出鎮安
武軍致仕卒上甚悼之子師周閣門祇候

李寔粗知書善騎射輕財好施貞祐初縣人共
推寔爲四鄉部頭與弟雲率衆數千巡邏固安
永清間充義軍都統遣軍分護清滄河路募賈
船通海道遷授河北東路行軍提控授金牌金

牌舊制非宣撫副使不得佩蓋特典也副將孫

江以滄州降於王楫將兵圍觀州靈詐作書與

江約同取滄州者楫得書果疑江與靈有謀召

江還殺之靈乃定觀州而還遷棣州防禦使賜

姓完顏氏興定元年討平泰安滕充間土寇擊

走紅襖賊於海州二年與宋將戰胸山於隔湖

港作暗橋渡兵及昏火起山下宋兵驚潰改定

國軍節度使擢其子爲護衛元光初以本官爲

安撫司守同知歸德府護百姓之遷南山者明

年卒於任

李伯淵本安平都尉司千戶美姿容深沉有謀
憤逆臣崔立劫衆降元汙穢宮闕欲仗義誅之
天興三年六月甲午與李琦等定計傳近境有
宋軍伯淵陽與立籌備禦翼日伯淵燒外封邱
門以警動立是夜立殊不安一夕百臥起比明
伯淵約立視火立從苑秀折希顏數騎往諭京
城民皆詣太廟街點集旣還行及梳行街伯淵
請送立還二王府立辭數四伯淵固欲送立不

疑倉卒中就馬上抱立立顧曰欲殺我耶伯淵
卽出匕首橫刺之洞而中其手之抱處再刺之
墜馬死伏兵起合殺苑秀折希顏後至爲軍中
所砍走梁門追斬之伯淵繫立屍馬尾號於衆
曰立刼奪烝淫大逆不道古今無有當殺之不
萬口應曰寸斬之未稱也乃梟立首望承天門
祭哀宗軍民皆慟

元

朱國寶修內使存器子也存器常夜行盧溝橋

獲一囊金坐而待其主還之憲宗時募習水戰者國寶以職官子從軍世祖以兵攻鄂國寶率銳卒於中流十七戰諸軍畢濟從征襄陽造戰艦築萬山堡至元十一年拔涉洋墮新城皆有功初師次江上國寶請於丞相伯顏願當前鋒伯顏壯之遂從渡江下鄂漢臨岳州降湖右檄諭郡邑之未下者破武岡思播蠻獻俘江陵行省累遷懷遠定遠大將軍海北海南道宣慰使十六年移鎮瓊州立官程更弊政訓兵息民具

有條制招南寧謝有奎以其屬來歸繼破臨高
蠻寇五百人降居亥番毫等十九洞畧定大黎
密塘橫山生致大小鍾諸部長二十四年入覲
帝慰勞再四明年進輔國上將軍都元帥參知
政事行尙書省事以軍事至贛州得疾卒於傳
舍年五十九長子斌襲職鎮福州次鼎次鉉皆
顯

楊傑只哥家世業農傑只哥少有勇畧太祖畧
地燕趙得之從攻遼左及從元帥阿朮魯定西

夏諸部最已丑睿宗賜以金幣命從阿朮魯攻
新安朮魯知其才畧出諸將右令裁決軍務信
安城四面阻水數月不下朮魯從傑只哥策說
降其帥辛卯大名守蘇椿叛討獲之議屠其城
傑只哥曰怒一人而族萬家非招來之道也乃
止滑濬等州望風納款壬辰師次徐州阻河不
得渡傑只哥偵知有賊兵操舟楫伏草澤中率
勁卒數人憑河擊之悉奪舟楫師遂濟獲河南
諸郡降人三萬餘戶進攻徐州金將國用安拒

戰傑只哥率百餘騎突陣大敗之擒一將而還
時皇太弟駐兵觀戰喜曰此真飛將軍賜名拔
都太宗聞慰勞甚至乙未麾諸將縛艸作筏渡

濠梯城先登由是連克五州十縣四堡二寨已

亥大捷歸德城率舟師追擊溺於中流年四十

子二孝先僉江北淮東道肅政兼訪司事孝友

鎮江路總管補贊曰傑只哥善以少擊衆非獨

其膽畧優也憑河奪楫作筏渡濠殆深於兵法

焉至於說敵帥止屠城又卓乎得大將體矣使

天假之年當在史天澤伯仲間惜乎未竟其用也與朱國寶並歲元史而舊志顧逸之彼其才夫豈在國寶下哉

劉深歷事數朝累官中書省左丞有幹濟尙節操晚年休沐里居慨邑中學久未建故自金大定設縣來登科目者惟馬琪一人而已乃卽舊榷鹽院改創之相度經營規模宏厰土木費以千計邑人士之知勸學實自深開之贊其事者宜慰使朱斌御史普顏蓋深同志友也

明

蔡完者不花故元將元亡納哈出守金山數擾

遼蓋二州間不花實左右之不花有子五人皆

驍勇善戰雄於北邊太祖屢以書招諭納哈出

不聽十九年十二月乃諭宋國公馮勝征之先

運粟松亭關及大寧會州富峪等處明年四月

諭進兵六月勝師襲金山取納哈出降其衆以

納哈出令招不花乃來歸九月上捷納哈出入

見封海西侯而授不花爲都指揮僉事分隸寶

坻遂家焉長子撒里襲職有名將風與其父俱入鄉賢諸子亦皆以勇畧授指揮千戶等官

贊曰舊志不花傳祇洪武中隨納哈率屬附降一語初不詳其本末烏覩所謂鄉賢者哉予據朱國禎史概谷應泰紀事乃得約畧而彷彿之元亡已二十年而不忘舊君與明師相抗及納哈出見執招之始來其志亦可悲矣嗟夫無以臣王保保太祖輒爲唏噓子不花以世職倘亦謂奇男子之亞與

按明史概洪武二十年六月丁未宋公取納哈
出及閏六月己酉朔完者不花乃降不系蔡氏
然必卽此人也蒙古本無姓其二云蔡者當爲歸
國後所賜耳又考十一年十二月曾擒元平章
完者不花則先降納哈出事九年矣故於此書
司徒完者不花以別之然則不花之在元蓋司
徒也今未敢定其必然
但云故元將以俟再考

李輦柴愚並祀鄉賢皆洪武中太學生也舊志
云輦授杭州知府有善政民思慕之愚擢御史
以風節著蓋明初重國學之選故由國學起家
者皆卓然有所樹立云 贊曰洪武時特重國
子生猶得古者書升論秀之意焉初教於文華

武英二堂號曰小秀才學成授官不次優用而其由科目出者或止授丞簿舉人再不中式且黜爲吏豈偏重哉誠以鄉舉里選慎重而貢諸京師與決得失於風簷寸晷者有間也故其所拔擢亦大率以稱職聞觀李柴二公可知矣二公之官年月不可得詳然考洪武八年六月巳丑以國子生李擴等爲御史柴公之任意在此時乎卽李公出守當亦在先後間耳

韓士舉洪武中以辟舉授平陸縣丞廉能慈惠

秩滿當遷民籲留之若赤子之戀慈父母士舉亦久與之居而不忍去也在任凡十八年卒於官巷祭路哭

劉英亦由辟舉起洪武中授繁峙知縣清廉守法深得人心會以事罷邑人爭詣闕陳之上顧謂左右安有得民如此而肯爲紕政者哉命還其職以懷人望蓋洪武二十七年二月辛卯事也後考滿改雲陽縣繁峙人至今祀之 贊曰英之政績統志省志邑志及輿圖備考皆載之

然云秩滿縣人詣闕保留詔令復任仍命禮部
書其政績曉示天下則非實也考明大政記云
宥繁峙知縣劉英旁註從士民之請而大訓記
每歲每月之詔諭必書亦不見有所謂命禮部
曉示天下者惟十八年七月丙子有一詔又與
宥劉公時年月不合意韓與劉同時同邑而傳
者以韓之事誤屬之劉耶蓋士舉在任十八年
則其秩滿也明矣所以久而不去者必由士庶
之懇留也劉在任不聞甚久一朝罷去舉藩訟

枉愈以知直道之在民豈必秩滿當遷乃見循
良異績哉予故考其實而更定之非故異於諸

志疑則傳疑信則傳信蓋其慎也

余既爲此說邑人猶介疑

信間刊後乃購得山西省新志其傳云以抗疏
言事解官去父老詣闕保留得復任益自喜所
見之不謬云晉志蓋吾
師儲書山先生所修也

李素永樂辛卯舉於鄉是科邑之獲雋者凡四
人而素尤以才學著廷臣交薦特授御史望重
臺中宛如驄馬風裁也晉副使嶽嶽懷方得憲
臣體僚采皆欽憚之

朱德少時以推擇爲吏風度端凝才識明鍊識者歎其不羣臺府交辟授臨江知府爲政務持大體上交不諂下交不瀆累陞參政歷官愈久操執愈堅人以况諸薑桂之性

趙瑗入成均有聲期滿授刑部主事能以經義証律令廉明平允物望歸之邑中以國子生起家者李柴而外惟瑗最著自宣廟後則科目重而太學衰矣

王鏗宣德乙卯舉應天鄉試第一才名籍甚筮

任費縣起周振敏以治行聞擢御史出爲浙江按察司副使尋坐陞本司平情執法不枉不縱後以致仕歸施地廣學基置文廟祭器於後進多所成就邑人仰典型焉

芮釗字宗遠正統進士由御史歷江西副使遷陝西布政使所在皆有政聲迨巡撫甘肅訓卒伍謹斥堠廣蓄積三年境內晏然會丁內艱奔喪朝廷重邊計特遣官營葬詔還鎮時寇入涼州莊浪諸處釗分兵進勦所向克捷寇出沒幾

一載而城守無虞居民不致流散者釗之力也
既勞於王事又痛不得終喪竟卒於官惟餘敝
衣數篋而已幾無以殮襯歸童叟爲之嗟歎

呂欽以景泰癸酉舉於鄉先後知安東大同兩
縣能各視其人情風土所宜而整理之天性渾
然和易及據理執法則又絕不可干以私兩任
縣令襤被蕭然人以此服其守也

王傳以成化乙未成進士知武城縣事歎曰學
道愛人明訓具在可不念哉適邑中荒歉力白

於上官設法濟之有寃獄沉滯者數年矣傳至
乃得白人誦神明報最擢御史按歷兩省風采
肅然

牛魯登弘治乙丑進士由主事遷郎中皆在戶
曹嘗曰我書生何知錢穀然大學一書與周禮
相表裏理財之道在得其平而已居部數年清
勤盡職謝事歸與弟逸曼相友愛以理學訓迪
子姓循循然莫不有規矩

龐淳登正德丁丑進士授行人司遷員外郎氣

象從容動必以禮出爲徽府長史徽藩知其賢亦心折之上聞乃以長史加陞正三品前此未有也

杜盛以正德辛未進士授推官推官號爲司李刑名所專寄也任者輒徇按臣意旨遇事風生盛獨以厚重持之政不煩而民不擾擢員外郎雅量清操始終一轍

高敏學登嘉靖庚戌進士授行人司以風節自勵視權貴蔑如也旣擢兵科給事中益慷慨思

有所論諫時趙文華爲嚴嵩私人嵩力援至通政冀四方彈章至可預爲計文華藉嵩勢益無忌敏學憤甚具疏糾之帝大怒詰責敏學侃侃不撓廷杖折脅絕脛而卒後嵩敗乃逐文華其子懌以齋祀停封章日請假送父帝立黜文華爲民戍懌邊衛以禮科失糾杖都給事中謝江以下六人蓋悔前杖敏學故也未幾文華死詔追贈敏學光祿寺少卿卹其家 贊曰投鼠忌器是念存而強項者胥結舌矣敏學憤權門鷹

犬痛哭請除豈復有所忌哉丹心鐵骨誠九死而不悔也及權奸既敗世宗憫諫臣冤杖後之不諫者等杖耳而薰蕕之相去遠矣嗟嗟宦官敗而後祀楊震祿山叛而後祭九齡歲寒後彫吁其見之晚也

芮元采嘉靖壬子舉於鄉授青城知縣孜孜民瘼惟恐不及邑有里甲派差爲累窮民莫能支元采詳汰之見四境多石田教以築圩闢萊之法田乃大治備載青城縣志中迨家居葛巾布

衣忘其爲先達也與之接如春風煦然令人自
化

郝鳴陰嘉靖癸卯甲辰聯捷吏部觀政除長治
令邑號難治鳴陰至約束堅明吏民帖然巡撫
石塘曾公深器之以卓異薦顧性鯁介不能媚
要津薦上有尼之者轉以閒散罷曾公爲之惋
惜而已及旋思詩酒自娛嘗度新聲命侍兒和
於臥側載酌載笑不知有寵辱事也自號放鶴

老人

苑囿以嘉靖癸丑成進士任鳳陽推官廉明仁
恕治績爲一時冠擢刑部主事轉員外晉郎中
皆不離刑曹屢決大獄多所平反人以方之徐
日知居鄉矩矱巖然未嘗一失言色鄉人咸敬
佩之

芮質田字昭余由選貢知醴泉縣事政簡刑清
不勞而理顧性耽文史雅不欲以能吏名會小
恙遽引歸與里中同志講藝哦詩澹澹不倦貴
人至則以病謝其冲情逸致有韋蘓州白樂天

之風焉

牛夔字近山魯之季弟博學好古爲文爾雅典則雖諸兄亦以爲弗及也顧諸兄俱登科第而夔九薦不遇充嘉靖甲寅歲貢歷任宜川六合太原司鐸學者久耳夔名所至輒交慶得師致事歸足不履城市四十年而四方慕義者造請無虛日至萬歷辛丑夔年百歲矣屢舉賓筵詔給羊酒粟帛夔雖老神明不衰望之若魯靈光由子孫以及曾玄列膠庠者數十人時呼而詔

以經解不倦也又數年無疾終所著有近山樵
唱集

苑時葵萬歷庚辰進士才高學博名震一時其
任陽田縣抑豪強革蠹役除耗羨先養而後教
之號山石循良第一報最乃引歸爲風雅總持
乞文者踵至凡邑中大著作多出其手學者從
之問字所居處比於雲亭後來才雋士牛及苑
氏門云

王好善字元甫別字四來以萬歷辛丑成進士

少負異稟日誦千言爲諸名流所賞識釋褐任
開封推官聽斷若神嘗一夕夢歐陽永叔詣階
下求脫心怪之旦日治簿見有蘇繼歐者曰異
哉兆矣遂力雪其寃蘇後卒成進士他所出疑
獄囚凡三十餘會河決朱家口衆議紛紜好善
請疏下流以殺其勢如言果無恙調青州擒妖
賊柳廷讚等梟之除十虎之爲民害者境藉以
安內遷都水郎命督清江版通運便商計稅額
工料所羨註籍上之居淮三年塞決河築戍樓

江淮人肖貌以祀再轉虞衡郎出守鳳陽甫赴任而卒鳳陽人悵不得被其澤開封青州聞之皆爲隕涕子兆辰爲名孝廉及曾孫采白有傳贊曰漢書之論循良謂所居而治所去而思如王公負其選矣觀於洗沉寃擒巨憝鋤奸扶良厥功懋焉而平緡算以惠丁商抑尤經國之遠謨也嗚恩者隕涕望澤者長歎不亦宜乎至歐公見夢事頗奇要之仁心爲質鬼神若或告焉亦一誠所通而無足怪者也

張奇勛萬歷庚子舉於鄉少穎悟至性過人事
父母以孝聞諸先達重其文行多折行輩與交
考選推官一時想望風采顧家居養志淡於仕
進伯仲聚處怡怡如也迨天啓中時事日非奇
勛逆知有銅駝荆棘之禍每閱邸抄愀然泣下
常對鏡自摩其頸崇禎丙子

大兵攻寶坻城番叛百姓紛紛逃竄奇勛獨不去介
而馳欲助知縣趙國鼎巷戰聞

師已入矣還舍驅妻子令投井出就國鼎所遂見執

語多不遜乃醢之其死事蓋最烈云 贊曰忠
孝一理故求忠臣必於孝子之門如奇勛者非
耶前志傳奇勛僅云孝德彰聞初不及殉節事
若有所諱者考修志時

聖祖仁皇帝方開設史館

詔天下網羅明季遺聞爲死事諸臣記實今史中所載
班班也而志獨諱之使不得與諸公並列惜哉
惜哉然志雖闕而故老所傳聞卒不可得而泯
意忠魂其猶在歟有高生年八十餘猶能歷歷

言之覆核其家所藏尤信因據以傳焉高生名
廣蓋忠臣敏學後也

王溥字德涵萬歷己酉鄉舉甫讀書卽慨然以
忠孝自命垂髫失恃哀毀如成人事繼母一若
所生釋褐知潞城剔弊釐奸以憂歸百姓皆揮
涕送之服闋補高苑循聲念著袂滿擢衡州通
判以老引歸修 聖廟建文園皆溥倡之以金
陵口屢決捐地築院其有德於里中甚大崇禎
九年

大兵猝至溥助邑令趙國鼎死守城破或勸溥去溥
曰奈何負趙公但揮其子鼎呂出曰先人一脉
汝延之吾畢命於此矣闔門男女殉者凡二十
餘人事定鼎呂歸乃號哭營葬自有傳 贊曰
趙公事見明史忠義傳兼及主簿典史訓導諸
人而邑志不之載余以是知圍城中與難而湮
沒者多矣及讀姜西溟先生王鼎呂墓表追叙
厥考死事狀顧其家請祀鄉賢時猶未及也夫
幸生寬大之朝

聖主褒忠親標明史而此邦如張如王邑志遺焉家
乘復諱焉猶賴名人之誌銘故老之口碑以董
董有存外此其孰從而求之此予所爲累悲而
深歎也

鄧光復字二密少負異才與張奇勛王溥杜立
德諸君相友善比舉天啓甲子賢書負聲已三
十餘年矣任山陰教諭山陰人知爲名宿也爭
禮重之擢邠州牧易直子諒令人仁讓之心油
然自生未幾引歸崇禎十五年

大兵再至光復實在危城中贊邑令高承埏居守及
鼎革隱居有薦者輒稱疾篤謝絕人事杜公雖
素契及既貴過訪之亦不得見也無何卒

國朝

杜立德字純一明崇禎癸未進士入

本朝以薦徵授中書選給事中疏請舉行

經筵以及定朝期嚴加派肅禁地多被嘉納所糾彈
不避權貴累遷刑部尙書每讞重辟必周詳反
覆冀求其生得則退有喜色不得則日中不出

署抵暮歸或竟忘食一日入奏畢

世祖章皇帝顧左右曰爾等識此人乎此新授刑部尙書杜立德也不私一錢亦不妄殺一人其爲

上所褒獎如此康熙初轉戶吏二部拜保和殿大學士殫心獻納具得體要

聖祖仁皇帝嘗歎爲不愧古大臣歷朝十餘年恩禮優渥嘗

賜宴

特命列坐殿內漢大學士入殿坐自立德始也以疾

乞休陳請再四乃令護歸

御製五言律詩一首及怡情洛社圖章以寵其行初寶
坻以隸通州故分派剝船百有二十甚爲民累
以立德力陳得稍減至是歸歛然若未有權位
者遇故舊有加禮人益賢之及卒

上震悼祭葬如例

賜諡文端方立德爲刑部尙書時當蔭子乃頓首奏
上臣子幼未學有弟立本差請練請以讓之

詔補立本刑部郎果稱職移戶部判度支惟謹出守

廬州大有惠政立本嘗曰吾不敢負君以累兄
知人之明也後與兄並祀鄉賢 贊曰杜公以
貽留碩果應運

興朝所條奏動關大計豈天實生之以佐太平耶
跡其縝密謹厚不求人知蓋得古大臣焚章削
草之意焉若夫情殷同氣讓蔭推恩亦其天性
然也而立本卒克自樹立不欲以負兄者負君
可不謂賢哉

劉兆麟字瑞符兆麒字瑞圖世則子也世則累

代仁厚嘗夢雙石麟入其室故二子皆以命名
稍長兄弟共學均有文武才不屑屑效書生佔
畢態麟登順治辛丑進士而麒隸禁旅供事內
廷由秘書院編修兩改啓心郎歷都察院左副
都御史麟謂曰事君事親理無二致然弟才氣
雋上且暮當外任爲國立功親老矣弟出則吾
當留已而麒奉

命開府湖廣將行拜親於堂上復拜其兄曰果以家
事累矣揮涕而別麟遂無復仕進意每遇選輒

不赴承歡膝下作孺子顏世則顧而樂之麒旣
之任盤根錯節游刃有餘宣播國威武功丕著
麟時貽書勉之世則亦諭曰努力答知遇老人
健在兄善事我無以我爲念麒益感奮旣而制
蜀省督浙閩節鉞所臨不察淵而徹不束濕而
威歲癸丑還朝會西南有警

天子方拊髀思頗牧青巖兵部尙書直隸真定援勦
總兵官趣速發拜父兄殊依依麟曰吾效戲綵
之歡釋爾牽裾之恨行矣勉之麒遂就道陳師

鞠旅調度井井軍聲大振乃更移鎮崇明海氛

肆靖

天子倚爲半壁長城無何世則卒以憂歸兄弟皓首
相聚一若童年共學時俱壽終麒初無子麟以
叔子殿衡嗣後殿衡仕亦至巡撫副都御史贈
本生父如其官父荷

諭祭兄弟並祀鄉賢

杜懋哲貢生見天下大亂隱居不仕李賊入京
縉紳俱迎降懋哲曰此賊特爲真主驅除難耳

及

章皇帝定鼎乃曰天下自此有統矣以薦出知長治縣
清勤盡職除驛馬之弊民歌之曰漢有召父繼
杜母我公之來邑安堵遷知岷州值獬寇之變
被執勸之降懋哲瞋目罵曰狂賊無多談吾讀
聖賢書而臨難苟免乎脅之罵愈厲遂遇害事
平贈按察司副使遺官

諭祭 贊曰懋哲隱居不仕以待澄清何異劉基之

望天子氣哉洎乎猝逢獬寇而抗節不屈致命

成仁又與王禕之殉節雲南後先一轍矣嗚呼
待時而出得正而終如斯人者豈有遺議焉

芮昌齡字與三由歲貢任京衛武學訓導順治

初徵授曲周知縣時李賊所授偽官猶在聞昌

齡名遁去入城密伺大猾之爲賊訶者捕誅之

乃繕城列堡修荒政招流民大兵方駐廣平刻

日輦芻糧輸之兵藉以濟擢知商州州城七破

於賊衛舍俱廢雞犬無聲昌齡至設法招徠入

城者方得丑六十家而賀珍之亂又作乃能激

勵其民與之堅守賊引去因請於陝督孟公假
兵三千俘二隻虎賊黨兩院交薦再轉廬州同
知駐無爲州會有丈洲池之役還至泥汭鎮聞
土賊伺間攻城急遣水兵數道分擊大破之擒
其渠蕭鳳鳴邢老虎等江院王公歎其才令兼
攝巢篆緩撫殘黎緩征恤獄三月而諸務就理
已丑召見遂請假不復出構小軒名曰靜致與
子弟讀書其中邑才雋時請業焉居久之卒
贊曰齒公未易才也平劇賊撫流民其事甚難

而功甚捷雖虞詡之治朝歌不是過矣一展其
長遂不復出神龍見首不見尾其芮公之謂乎
曹爾素入旗籍品粹蘊優受

世祖章皇帝特達之知由內弘文閣額記庫歷陞侍讀
學士供事禁近敬慎小心未嘗有過舉中朝以
方霍光金日磾也時金聲桓姜瓖諸逆相煽
上知爾素夙有才畧

特簡從軍爾素亦慷慨有滅此朝食之志至軍則羽
書旁午皆倚辦焉屢出奇制勝會寇大集傳令

急擊爾素深入陷重圍中遂遇害事聞

上甚悼之遣官

諭祭誥封拜他喇布勒哈番世襲

楊雍字西涇學術深醇行文一準先民不屑鄧
陶以下康熙壬子果冠京兆試癸丑不卽提留
京師從顧亭林受左氏春秋經學益邃已未成
進士改庶吉士邑中科日雖盛未有官翰林者
有之自雍始授檢討與修會典恪勤厥職

廷試詞臣雍詩稱

旨獨褒獎之生平不附權貴不棄單寒家無餘貲左
琴右書蕭然殊有以自樂卒之日幾不能殮人
尤重其清操

杜恭俊字承三大學士立德季子也以恩蔭補
工刑兩部司曹綜核詳審具有條理以憂歸康
熙庚辰迎

駕三河

上詢知故相子甚喜并問立德葬處

御書永言惟舊四字賜之補刑部督捕郎勘選總許

多所保全出知廣信府未幾卒恭俊內行完備
推財讓產尤能濟人緩急有某姓者逋官賦三
百金將鬻其女恭俊捐金代償爲女擇良家子
配之其盛德類如此

王鼎呂字翼明溥之子也明丙子城被溥舉家
死於兵鼎呂年十七耳獨與從姪烈得免號哭
營葬并期功諸暴骸瘞之遂流寓京師數年乃
歸理舊業并爲烈完其家室撫從兄弟子女逾
於所生王氏復振鼎呂曰先祚不絕若髮危而

復安天也既屬有天幸敢封殖以自私乃倡修
邑城及河隄之傾塌者歲災出粟以賑見鬻棄
子女者爲收容之及稔還其家初無德色晚年
倣范文正公義田法捐租於城南青口莊規模
粗就卒行道之人爲之隕涕初鼎呂於順治丁
酉拔貢以痛父終身不仕而嚴訓其子子煥有
才名仕至按察司副使追贈如其官

芮淮字鄰海昌齡次孫也廩貢生少失怙恃獨
與兄濟依每念不及建養則相向而哭終身不

分爨沉酣經史尤酷嗜宋儒書曰舍此皆旁徑
耳其論文亦一以闡明義理爲主望日高當事
交禮重焉而淮雅不欲輕謁惟有關風教者則
侃侃白之生平不喜談人過有善則津津不置
口家本儒素而周乏張窮常若不及子四長復
俶領鄉薦次復傳學官至副使猶時貽書遠勗
曰勿忘咬菜根風流也沒後邑人思其懿行祀
於鄉

論曰人物中品日多矣惟名宦鄉賢獲祀於學

宮夫何修而致此其人蓋自有真焉舊志畧而
不詳則俎豆馨香直漫然耳余爲廣搜國史家
乘以及諸名人集或都不可得則以其時世按
之於是乎傳一人卽若有一人之鬚眉面目恍
惚而見於前者而勿乎爲之生敬悄乎爲之動
容意所謂真者其在斯乎其在斯乎就其中有
習沿而更之者訂訛也久軼而采之者補亡也
卽亦有夫人所豔而姑舍之者辨微也若夫大
憲之名不敢登所以宗體異地之才不敢僭所

以辨方一篇中尤兢兢焉謂人物之冠義更無
有重於此者矣

人物上卷之十一終

人物下卷之十二

尙有典型未祀於社含章秉文彬彬爾雅績顯
於朝行修於野方幅匪拘性天無假潛德馨聞
待予來者志人物下

文學

文者道之顯小技云乎哉自後人岐而二之視
文輕而道亦因以大病不知天文賁乎上人文
麗乎下莫非道耳苟能貫串折衷抉經心彰史
法尙已否則吐露性情發揮才識揚烈吐葩詎

非藝林鼓吹歟中行罕遇而狂簡成章雖聖門
文學選於是在矣余故於鄉賢外首列文學不
僅云文苑重辭也不別云儒林待定論也

明

楊愔嘉靖中名諸生沉潛力學於經義史法多
所研總與同時李廷梟苑因芮奠有四子之目
愔其冠也會邑令唐鍊修志延四子秉筆而愔
實總其事成上下二帙大者直書小者旁註無
溢辭亦無漏義蓋自嘉靖以前二百餘年事至

今尙有可考者愨之力也嗣後續修者厥數再
倍之而事實茂如矣晚以歲貢任平山訓導學
老文鉅士林式之廷烏亦繼貢出爲鄒縣丞

苑因以文學世其家諸昆圃固皆負才名因尤
有白眉之譽後圃成進士歷部曹固以貢授光
祿寺署正因獨久困場屋中然志不少挫與所
善楊愨李廷烏芮奠切劘以千古之事適唐令
修志延之喜曰寧不可藉是作一揚摧耶性好
施積館穀輒以濟人倡同志買地爲義塚亦其

一節也顧楊李猶垂暮得一貢而因與芮莫竟
以諸生老人咸惜之

國朝

苑瀛珮字蜚鳴康熙戊午歲貢少穎悟讀書一
過目卽通曉嘗苦家少藏書乃悉鬻所遺產購
書數千卷風朝雨夕披吟不輟貧至無以自給
人或尤曰聚書能療饑耶瀛珮坦腹示之笑曰
此殊不枵其風致如此康熙甲寅奉

詔修志邑令牛一象選文望秉筆瀛珮居首無何杜

大學士家居遂主其事瀛珮曾偶脫一藁學士
欲有所更動固執不可曰易隻字卽難以傳信
學士領之而已未竟志局竟謝去後任廣平訓
導所著有詩古文各二卷

張嘉生字文休爲奇勛從姪行學有本原自少
時就試輒冠其曹論制義能兼綜有明一代之
正變而參酌之嘗謂取諸王唐以定其程取諸
歸胡以達其氣取諸金陳以窮其態雖時文猶
古文也人以爲名言才甚高未嘗有幾微自矜

色曰滿招損謙受益彼沾沾自喜者適見其器
小耳後充貢授河間府教授所以教人率此意
也

單者昌字蔚起幼以才名與薊州李公孔昭同
里杜公立德爲友相得無間者昌爲文伸紙疾
書風發泉湧試輒屈其曹偶早餽於庠

國初充歲貢淡於仕進遂不復應試杜公位至大
學士數念故人而者昌稀復往來徜徉田野間
悲歌感慨時有所作旋亦焚之未幾竟卒

劉繼寧字兌菴工文章負意氣千金一諾有古
俠士風當明季嘗捐金贖難女二爲之擇配歲
饑煮粥以賑全活甚衆與同里崔周田善周田
有緩急恒資之如已事周田亦弗謝也晚年爲
子擇師乃裹糧遊盤山踪跡李公孔昭得之相
樂也已而相泣宿經旬具道意曰吾家僻處海
濱兩岸蘆花倘不拂先生高隱趣乎孔昭許諾
至今諸子受業暇則招周田倡和視人世利達
如浮雲然竟不與試終身稱老布衣子三從雅

從心從正皆以文行顯雅授從化知縣作孔昭
墓碑誌銘則心所撰也正子浚字蘊哲景知名
崔周田字錫齡順治中充歲貢不復入場屋性
嗜書嘗構一樓聚古本及金石刻萬卷藏之終
日吟嘯其中李公孔昭隱於盤山物色者輒不
遇周田過之往往坐林石間相勞苦孔昭亦時
下榻其家命諸子師焉并迎孔昭母事之維謹
以女妻其子此孔昭賦謝詩所以有高堂代我
供甘旨花院呼兒說史書句也孔昭沒周田漠

然無所向久之卒

高元愷字際斯鍵戶窮經無間寒暑其治詩也
尤於箋疏傳註外別有心得門人嘗問三百篇
蔽以一言其旨云何曰人於思慮之微毫無邪
曲則性情正矣性情正則興觀羣怨無不中於
自然之節事父事君無不盡其當然之道下至
鳥獸草木無不窮乎陰陽剛柔之理擴而論之
內聖外王悉統於思無邪一言蓋自道其所得
力也諸弟子中王師旦最著

王師旦字淑莘寶坻教諭元洲國賓子也幼隨父之任父謝事遂隸籍焉師旦生五歲卽能通孝經義旣而學文於張文休受詩於高際斯講易於蕭韓坡問禮於吳攬初叩心學於蔣闡如而証性理於李光四業日益進自學使熊鍾陵先生有國士之目繼者交口無異詞凡二十餘試皆第一而師旦年且老矣以康熙丙寅充歲貢遠近耳其名爭延主講席所至無不折服者嘗曰人於日用行習間時將天理體認令其惺

惺不昧則寡過之道得焉師且雖老未嘗一日
廢學所著作皆以抒寫心得無復人之見者存
戊子授容城訓導葺學宮備祭器舉節孝爲元
儒靜修劉氏立後手輯文廟備考一書在任十
有六年士多化之雍正癸卯引歸卒於里他所
著斯文纂南華註語錄年譜及文集詩集凡數
十卷學者稱曰盤峯先生 贊曰盤峯者故安
節李先生之所高隱也師且自少虛懷集益其
所得力者博矣而心性之學要獨於安節有默

契焉門人號曰盤峯抑亦志高山仰止之意乎
觀其躬行體認時以安節之訓爲惓惓天假之
年而竟其學允哉其能步芳踪追逸軌也是師
是弟余亦翹首企之矣

馬侗字汝誠康熙戊寅歲貢不爲口耳之學一
以實踐爲宗幾微言動無少忽每爲從遊者陳
說經義必正襟危坐動色而道之雖盛暑未嘗
一解衣一脫帽也嘗引朱子彈琴心不遠及程
子某寫字甚敬語以勗學者故及其門莫不循

循有規矩後進遭于道必却立指示曰古先生
王煥字子千溥之孫鼎吕子也喜博綜負意氣
自少卽慨然有尙友千古之志不屑屑治帖括
曰尋行數墨中安有不朽業哉乃大肆力於詩
古文詞以貢授光祿寺丞晉刑部郎每退食與
朱竹垞姜西溟趙秋谷諸公樽酒流連揚扞風
雅一時有華省仙郎之號及出守惠州政簡刑
清攬風問俗艸木山川皆供點染又與其鄉名
宿屈翁山梁藥亭陳元孝遊詩境益進今世所

傳憶雪樓集是也觀察永寧以憂歸久之再補
溫處副使乃悉先世產讓諸昆弟飄然南行旣
之任潔清自矢一如守惠時顧性耽風雅不欲
久羈仕籍曰吾將恣遠遊以自快乃渡澗瀝泝
沅湘尋禹穴弔蘇臺僑居白下陽羨淮陰間所
至輒交其地之賢豪花朝月夕每載酒揚帆時
令歌兒按拍雙鬟捧觴唱所製新樂府望者疑
爲神仙中人也晚年或勸歸曰吾家故號南王
可南亦可北也比還卒所著有少作偶存田盤

紀遊蜀裝蘆中礪上秋山嶮衡遊并鄉前後寫
憂及還庚諸集十餘種惟憶雪樓集久刊最行
於世 贊曰古稱感慨悲歌者燕趙之風也將
毋有不足於中和者歟讀憶雪樓諸集沉鬱頓
挫中何其婉曲而多風也跡其勤學好古幾盡
交天下之賢豪取精用宏豈猶可以土風限哉
屈指畿東作手殆出申鳧盟米紫來上矣

芮嘉珍字楚珩康熙戊辰歲貢經術湛深修辭
典則芮氏固多聞人而嘉珍文行尤爲舉宗所

推然不汲汲於聲譽謂爲已爲人學術之分惟在乎此務在實勝而已寒氊敝帳數十年如一
日風饕雪虐隱几讀書吟嘯自若

王采初名采字同侯四來先生好善之曾孫也
好善生兆辰兆辰生乃餘皆名孝廉采爲乃餘
仲子生而敏雋出語驚長老弱冠遊庠旋食餼
益發憤下帷十試報罷不少挫薦者知采名邀
一見爲異日游揚地采婉言謝之卒不往甲申
貢成均爲大司成孫樹峯所器教習胄子期滿

當銓次爲令弗屑也悉發四庫書紛綸蒼萃靡
不條貫爲文日渾博無涯涘會子枚士由鉅鹿
教諭遷常州司馬采年已六十餘矣猶應京兆
試再薦再不售乃曰自今當撥棄舉業一以詩
古自娛耳枚士迎至江陰署訪邑中名宿朱近
菴蔡嶽樵孔秋岩輩登君山望長江飲酒賦詩
淋漓盡致逾年歸枚士亦旋以養親還也每扶
杖攜壺眺遺臺尋古碣徘徊空山老樹間興之
所至短歌長吟卽蘸筆書之書法逼古人以擬

諸唐詩晉筆又數年卒枚士字宁占奉采訓居
官有清執及署府篆痛繩奸墨已遷部曹爲忌
者所擠郡人爭扳留不得感嗟出涕其歸也采
喜爲無玷家法云

楊允盛字雲業邑諸生見治舉業者多不嫻古
學允盛心非之曰奈何徒汨沒八股中耶後見
王阮亭朱竹垞兩公詩歎曰此正聲也詩益工
家甚貧短屋數間不蔽風雨而允盛吟嘯其中
歌聲隱隱若出金石書法亦秀勁如其詩

政績

將以修之家者獻之廷階秩非所論也大者名
在旂常小者澤留碑口其爲政績則均邑先達
之以政績著者業祀於鄉彰已自康熙癸丑至
今又七十年縉紳先生間見叠出如劉韓朱芮
比者豈少也哉續考其事實詮次之并補前代
所未備者二人蓋與獲祀諸公後先輝映矣若
夫目前之著清名負重望者則又俟諸他日賡
續云

明

陳以魁倜儻自命不屑屑治家人生產意豁如也嘗與諸昆季以元以敬以經聚處談古人忠孝事輒色飛眉舞歌小宛之詩曰我日斯邁而月斯征諸昆季皆爲感奮以貢授河南布政司經歷才猷敏鍊上憲交薦擢兩淮運判通商惠民人甚德之會其子命新舉孝廉通仕籍以魁乃引歸曰自今事業一付兒曹矣遇丙子兵燹毀家紓難妻安氏媳張氏俱以身殉節甚烈事

見列女傳命新筮仕西寧通判撫治邊陲整飭
有方民肖像以祀晉處州同知陝撫以得民薦
會流寇變隱華山旣聞舉家殉難事益匿跡銷
聲爲終焉之計入

國朝徵書屢下乃除荊州府同知然回首北望恒
悽然泣下未幾卽告歸鄉人多倚重之 贊曰

邑鄉賢中命新列焉而不及其父自予論之若
考之賢命新所蹴然也傳不云乎子雖齊聖不
先父食孰謂並賢而可掩其先者耶余故補傳

以魁而以命新附至以魁卒葬年月無可考然
按三烈祠中安氏張氏姑媳位皆云陳門殉難
則以魁殆死於圍城中乎若尙生姑及媳將焉
殉或云卒於丙子前蓋命新猶未擢處州時也
是未可知又考高承埏家傳載十五年事無復
陳以魁其人以是知以魁定死緣前志於丙子
役多隱辭故傳亦存闕疑意云

郝瑜由歲貢除山東臨朐縣簿有能聲丁繼母
艱起復移簿山西之高平以才守署上上考其

考語云賦登而民不擾訟理而民不爭畧可知矣將超擢固以老乞休當道重違其意乃許之其歸也行李蕭然士大夫裝軸以贈百姓扳轅泣送者相望於道

國朝

劉殿衡字玉伯光祿大夫兆麒嗣子也少喜讀書負經濟才以蔭爲郎歷兵刑二曹大小咸辦出巡井陘遷保定守道未幾又調西寧西寧近邊界蕃回人錯處號爲難理殿衡至請改春徵

給戍糧草期至秋並河西五衛一例緩征其蕃
長車馬供應先期符驗郵傳肅清有治大魁者
掌回教頗樹氣節被誣就逮禍且不測殿衡力
白於制府佛倫上聞釋之賜世職諸回皆懼怵
羅拜以是聲震湟中擢江南布政使清隱冒除
版荒經水利賑饑民舉節孝政暇循行田野翺
遊山水間集名流觴咏如布衣交再遇

聖祖南巡嘉勞之親灑

宸翰以賜遂有開府武昌之

命武昌故光祿駐節處也殿衡周知其利弊而次第
興革之與湖南巡撫趙申喬會勘土司區處允
協荆巫諸土官皆佩威德無敢梗者以憂歸服
闋仍撫其地益爲澤國籌百世利築荆門沙陽
隄建巨牐劉夷陵公安間危磯牙角多設救生
船其有德於人甚大時大學士高安朱公方爲
潛江令以折獄平忤上官意將置下考殿衡與
制府力爭卒舉卓異以是朱公嘗語人曰吾自
爲縣令時守直道而不變者由劉都憲之知我

也在任數年勞瘁備至卒於官所部聞之無不
悲悼初殿衡既後光祿與本生諸兄弟倍友愛
仲兄殿邦字安侯英華卓犖累官至蘓松糧道
署布政使

聖祖亦曾書一州之表四字賜之人以爲一門盛事云

贊曰劉公自爲副使以迄開府觀所設施具
足爲法其功亦侈矣哉而張匠門編修墓志獨
亟歎其薦高安公及雪冶大魁二事蓋知人安
民政之大者於良有司中得賢宰相以伸天下

清廉之氣是知人也而無辜一釋蕃漢傾心懽
騰諸部所以安民者遠矣用是吳頭楚尾咸嘖
嘖頌公績不衰江漢滔滔且與方召並流不朽
矣

芮鈺字式之通曉經術有肆應才歷判安慶松
江重慶三府分符佐理上下咸愛重之鈺嘗訓
其子姪云余由皖江入雲間泝古巴子國足跡
經萬里風土旣殊人情亦異而所在輒安未嘗
一失懽於上下間者由待人信而處已謙也其

居鄉渾渾不露圭角卓然大雅後進奉典型焉
趙之藺字右廉由歲貢生授雲南大理府通判
時康熙二十七年三藩初定滇中甫離兵火民
氣未復之藺加意撫綏之而苗疆復兀兀蠢動
之藺乃單騎直入諭以朝廷威德諸苗羅拜聽
命旋即解散歷著勞績擢刑部員外郎三十五
年隨巡撫于成龍督糧運運至口外二十八臺
不辭鞅掌以軍功議叙引

見記名恩賚有加未竟其用而卒人咸惜之其弟之虞

後亦以西寧軍前効力議叙擢雲南曲靖府同知叙同功仕同地時人稱二難焉之虞今謝病在籍

王澤博字卓菴以貢考授中書出爲廣東肇慶府同知期年上憲知其才兼攝曲江縣篆凡九月異政累累曲江人爲之勒石兼刊政紀一帙報最擢四川馬湖府知府馬湖古夔地漢司馬相如所通道也其所轄有四土司澤博綏靖有方中外悅服以憂歸服闋補順慶守未之官而

卒澤博所在有聲而見於曲江政紀者尤詳汰除耗羨至爲民捐解費賃夫役去之日幾不能具舟車貸新令百金乃得發其聽訟尤有神曠之號曾有楊辛閏報被盜指火光中譏楊觀養蕭文輝二人捕至澤博視文輝非盜類也而觀養堅謂合夥皆由文輝并供其夥某某及驗賊多敝帳破衫類辛閏以爲是觀養亦自承他日乃取舊袍衫各一雜諸賊內試之識認復如前澤博大怒據治乃得其賄盜誣扳狀如律論釋

文輝等又一日平明往鄉檢驗見數人負巨擔疾走足沾泥似遠來者呼詰曰若輩安往日遷家自何許來曰某村遽命執之及就訊果自隔縣仁化譚家行劫者也其他發奸摘伏大率類此贊曰異哉澤博之治也緊操何道而神明若此良由惻惻愛民時恐有幾微之寃抑是以愛深而誠積誠至則生也然則其雪誣糾慝仍卽捐費貸夫之心所溢而出焉者耳折獄惟良殆有本哉

楊亢字擇中雍之弟也康熙甲午以歲薦授盧龍學教諭每月朔望必集諸生會課省俸具供給與諸生宴談竟日藝成則面定其甲乙優者給以紙筆迄今盧龍文風甚盛猶佩亢之教也乙未大水歲饑代貧士請賑數多不能徧給乃自出糧五十石以代賑盧龍相傳爲美談云丁酉以老引歸卒於家

王燧字子覲繼鼎昌後本鼎昌仲子燧之弟也燧以才名聞遠近而燧則恂恂謹厚居官居鄉

始終一轍歷官河南南陽府同知遇事縝密務
與郡守協恭以濟是以動無齟齬民稱長者嘗
誦馬援戒兒子書以示訓曰畫虎不成不如刻
鵠處世之方持身之道俱不外此其子弟篤守
家法人以比之萬石君

杜適文字紹衣大學士諡文端孫恭俊子也性
至孝十歲居父憂讀禮盡哀旣長博觀羣書工
舉業日夜淬勵思一第以紹前烈不汲汲仕進
雍正己酉

世宗憲皇帝念舊勞

特召見奏對稱

旨發河南試用適文以未卒業辭弗許歷署內鄉郟城
西平臨潁縣篆政聲翕然時制府田治尙嚴明
適文隱以寬濟之決獄平無少枉者捐養廉募
夫築隄親督率之比隄成水發不爲害擢鄧州
牧制府方行開墾令察民間欺隱者適文所報
獨少他日詢之曰他邑自多鄧州自少制府無
以難已乃大修文廟重建春風閣百花洲一時

以爲杜母復出乾隆元年移知陝州城中向資
渠以濟汲歲久淺涸通文率民疏濬自分水嶺
注城凡三十餘里水常不竭州儲穀萬餘石時
發礮以賑陝出入數親較之猾吏無所措手會
母穆宜人卒於署扶櫬北歸哀毀骨立病遂不
起年止四十有四大學士桐城張公表其墓
趙霖字雨若由貢生知陵縣事先是邑中歲連
歉民殊不聊霖至會蝗蝻復發捐俸募夫督捕
無遺種乃不爲災時檄徵積欠千二百餘霖曰

民方困焉能速輸爲設措墊解民未之償也及
擢沂州牧竟免之童叟皆爲感激旣之沂以憂
去服除補中倉監督再知汝州俱以清勤著無
何卒

耆英

丹青錯采竹帛垂勛文學政績分道揚鑣者奕
奕若前日事矣若夫不尙文而順理成章未爲
政而束修服物倘有足乎已無待於外者耶是
乃所謂達尊也洛社香山風流可作豈獨禮先

一飯云爾哉

明

牛如登百歲翁。負之豕孫拱室子也。生而端疑。有至性。從其祖受書。祖心器之。游庠。後名聞燕趙間。每學使按部。與父互冠。其曹百歲翁卒於萬曆壬寅春。拱室年已七十有八矣。是年秋亦卒。時兩喪並舉。五世同居。送死養生。皆視如登。一人主辦。如登竭誠盡慎。雖六十許。幾致毀家。口多至百餘人。撫之各得其道。內外無爭競。失

禮者遇里戚從厚有冠婚喪祭力不能舉者輒竭力助之以貢授順德府訓導數年致仕再舉鄉飲大賓至八十四以壽終牛氏祖孫三世經明行修任學博舉賓筵躋上壽蓋如一轍云

國朝

陳應瑞順治初歲貢當明季時爲諸生親遇丙子之難時城中男女死者數千人骸骼暴露溝壑俱赤應瑞於西門外以地十二畝將未火化者立冢會瘞作文祭之邑人皆感激焉後授易

州訓導老成典型望之如魯靈光

牛文曜字九章邑庠生少卽留心經濟以伉直爲邑中所推入

國朝當事方需材應募爲薊道監紀所籌畫多關政要久之謝去邑有爭財者訟經時矣文曜歸慨然輸五十金解之兩造胥感愧令聞詣門致禮書額以旌敦舉賓筵巡方使者上其名於朝未及用而卒年六十餘

劉殿颺字元公兆麟子也次殿邦次殿衡衡繼

兆麒後以蔭起邦亦由貢就銓颺獨不仕謂諸弟曰昔先君登上第顧養親四十餘年卒勉成叔父勲業今弟輩皆用世才襲蔭受恩當努力予分爲家督敢不繼先君志乎嗣後吏部趣需次訖不就治家井井有法度嘗籍其歲入寄諸弟佐俸薪餘貯以贍族諸弟仕吳楚間時驛使往返聞有關政體者輒手書以寄每閱邸報見所上疏善則色喜爲進一餐居鄉慷慨好施賴以舉火者甚衆邑有大事以告必欣然倡率之

至於排難解紛但一言無不永釋者晚邀故舊
聯詩酒會如香山社中人優游林下以壽終

張振漢字翼宸鬚眉偉異崇尚氣節輕財好施
康熙十八年地震城中廟宇俱壞無一完者振
漢次第倡修貲爲之竭時石幢亦傾碎其頂墮
一銀匣藏佛牙二振漢珍重藏之重修時復納
焉迄今邑中古蹟得以具存者振漢力也晚年
家旣乏然振漢蕭然自得初無悔意年過八十
無疾終

鄭莊字南華幼有大志以豪俠自喜嘗讀班超傳歎曰大丈夫當如此遂棄制藝習韜畧起家至參將值鼎革隱居北塘北塘者海濱也每見風雲接地波浪兼天則悽然感泣有子曰之僑爲擇師罕當意者一日晤王師旦喜曰此其人矣因具厚幣延之至日與師旦談古今治亂興亡之故奮袖掀髯不自知其老也居久之卒郝豫章字公奇康熙庚午歲貢方正不阿以學行爲合庠所推常設教家塾有旗員司鷹犬者

方出獵犬入其室豫章逐之其屬大譁豫章訴
諸邑令牛一象一象寄語旗員曰此吾邑中端
士也君無介意旗員飭其屬竟去後舉齋長請
於學博校學政全書定兩廡位次序徧栽樹於
文廟中至今翠栢森森猶傳豫章手植也將選
訓導以壽終

芮濟字允康幼有至性年十六怙恃兼失捨地
呼號哀感行路時兩妹一弟俱稚弱濟左提右
挈日夕不離常含糗糈口哺之保護惟謹其弟

淮也稍長出入必偕偶不見卽急覓負以歸時
家計不支濟僇力爲治生計然未嘗廢學既有
室乃以家事委獨與弟攻舉業雨榻風窗篝燈
不輟遂得先後遊庠迨弟妹俱婚嫁畢友愛不
衰顧中年久困場屋恒鬱鬱不自得復屬望子
姪時鞭策之及壬午乙酉間兩姪聯舉於鄉已
丑復傳成進士濟且喜且悲曰祖宗緒始不墜
矣天性勤儉衣不重帛食不兼肉年過七十弟
爲具甘旨費輒却之曰我茹淡久不慣他味也

然睦親族厚交遊遇緩急又往往傾囊爲之伙
助復傳筮仕錢塘令濟罄哀其歲入爲宦資令
弟寄語云此去當不名一錢乃不負都憲家聲
也厥後復傳歷任越中廉潔一節濟實有以玉
成之壽至八十有九 贊曰子讀斯干之詩未
嘗不欣然神往也如竹苞如松茂皆由式好無
尤有以啟之和氣致祥豈不信哉濟少遭閔凶
哀念鞠子撫之成立由弟及姪卒大其家非所
謂竹苞松茂者耶向微濟則芮氏之業衰矣家

道重光賴濟一人嗚呼此又姬公所以太息於
凡今之人莫如兄弟也

單聯正字君對考授州同知豁達有大度戚屬
間遇緩急叩之無不立應者里中呼曰善人又
曰善太公蓋以單善音同也然聯正初無德色
嘗謂指困連舟亦尋常事太史公以爲好行其
德則與立人達人之意異矣聯正沒聞者皆爲
失聲

劉斌字玉憲以任俠雄於鄉里善騎射能開數

石弓中康熙戊午科武舉慷慨仗義濟困扶危
里中有不平事則挺身出必得直乃已或豪暴
橫鄉曲斌直前摧抑之長令聞其名遇疑難必
就諮焉年至耄耄意氣不衰訓戒子孫大丈夫
當爲有用才勿齷齪作自了漢然胸中故無城
府家居無事則雅歌投壺恂恂如也後孫本涵
亦以武額起家累官至四川遊擊 贊曰太史
公云俠以武亂禁非所以爲訓也將以拯人危
脫人急乃至身也宜其與豪暴之徒同類

而共目耳以予所聞邑紳劉斌其俠骨有出於天性者耶跡其生平止以摧抑豪暴未嘗不循循法度中也所由殆與朱家郭解等異矣

王嘗字介石四來先生之曾孫乃真子也少嗜書工文章有聲膠序間言默行淳於世俗紛華泊如也不矜才不恃氣落落焉自率其真鍵戶家居栽花草理琴書惟遇素心人相對不厭俗客至則避之曰無久溷公爲也

曹琦字子輝邑諸生曹氏故望族而琦尤有名

於庠以敦倫立品爲縉紳所矜式與父言慈與
子言孝誠意懇到人久與之居而不忍去也家
範雍雍聞其緒論者比諸顏氏家訓其弟璉字
子馨亦以才品見推邑中遇事不沾沾節目間
考授州同知未仕故其用不顯於世云

王熿字子弢亦鼎呂子也伯仲均歷仕途著宦
蹟熿早餼於庠不求聞達曰我惟守先人之舊
廬耳性情和易遇卑幼亦未嘗疾言遽色足跡
不履戶外惟一經課子故其子皆以文鳴長石

柱康熙甲午舉於鄉季嵩柱亦以乾隆辛酉選
拔嵩柱少穎慧爲煇弟燧所愛請以爲己子竟
許之

孝義

如前所傳大率皆縉紳望也至孝義而齊民之
得列者半焉蓋孝弟者人之所不學而知不慮
而能也匹夫慕義何處不勉豈必盡在士夫哉
惟不必盡士夫而篤行所積久迺益彰至使聞
其風莫不洒然動容抑或盡然流涕嗚呼此其

故可思矣立品自有真何名位之足云

元

田善甫家貧竭力事親已或糟糠不厭而甘旨之奉未嘗缺親老矣嘗乘一驢遠走燕趙郊善甫則徒步相隨敬扶掖之旦暮不離側左右就養服勤至死至正間詔旌其閭

明

陳英早孤獨與母居相依爲命母卒廬墓三年風朝雨夕仰天長慟羣鳥悲鳴妻死終身不更

娶曰若善事姑吾不忍忘也葬諸母墓之側

袁璽少而孤事母至孝娶王氏亦賢曲如璽意

母患痿痺夫婦朝夕伺候宛轉卧榻旁寒暑無

間者歷十八載一日王氏往塲穫麥遺米籬內

雞豕踐食之姑連叱忽下牀驅之步履如故迄

百歲乃卒人以爲孝感云 贊曰古夫婦之並

以孝著者姜詩王祥而外不概見如袁璽者其

詩祥之流亞歟孝感動天有以也舊志於袁璽

傳但稱其婦賢而不及璽舛矣藉非璽之純孝

則十八年中辛勤備至誰與黽勉同心者乎

楊一訓邑庠生嘉靖四十二年值兵變其母被
執一訓疾呼奔援力與賊格鬪賊逐一訓刃項
以死其母遂得脫按院以聞詔旌之

張改丈夫鄆鄉民父卒事母孝母病思肉味改
探囊無半文乃割股以進母病尋愈其疤痕收
結成蓮花形蓋孝感所致也天啓中具題建坊
旌表 贊曰明洪武中曾詔民間有割股剜心
傷殘肢體者勿以孝聞義頗近正然編戶小民

未嘗學問迫乎一時孝親之心且有捐軀而不顧者彼豈欲以博此名哉區區愚忱亦可矜也已若張改則更與他異母病思肉貧無以具倉卒應之雖彼蒼亦默鑒其誠而况於人乎卒邀旌表以是知明禁寃不果行也

芮浩伯重之子伯重教子素有義方而浩天性仁孝定省溫清一準古禮以選貢任韓城縣丞旋知交城縣事恪守庭訓以清白著聲念父母年高遂告歸怡怡色養宛如孺子親沒居喪盡

哀三年不見齒詔旌其門

苑景瑞邑庠生幼失怙敬事孀母承顏順志四十餘年不怠當父歿時諸弟俱幼景瑞撫之又曲體母心勉令卒業俱爲名諸生鄉里稱道無間言崇禎六年具題旌表

郝有光邑庠生崇禎九年

大兵攻寶坻有光宗人多助知縣趙國鼎居守事急有光泣謂其兄弟曰請各自爲計光則以死徇趙公矣吾家兄弟固多不患自我斬也遂策馬

冒陣而死其妻芮氏聞之攜三女躍入三教堂
前之河內時族人有名翀者夫婦亦同日死之
芮圖南邑廩生性至孝明末兵燹時不暇顧妻
子急負母王氏出走遇兵被執不屈死之妻王
氏聞姑與夫俱死遂挈一子一女投於水

牛鎡牛鏹同母兄弟也丙子城陷兄弟皆踰城
出鎡墜城下傷股鏹抱之哭鎡曰我已無生理
弟宜速去倘得脫可延先人祀屢揮之鏹不忍
去鎡拔所佩刀自刎鏹痛絕復蘓含淚行未數

武追兵至被刃仆地適蒼頭田忠者於火旁負
銷子之涓出急覓其主見銷已死鏹亦受傷乃
設法送至老鴉口小楊莊數月後創愈鏹撫之
涓如已子及長將所遺產歸之鏹後於順治甲
午年拔貢舉孝子之涓亦遊庠

薄敦復字見心邑庠生事親孝母病焚香籲天
願以身代尋得愈後父復寢疾終夜侍湯藥衣
不解帶崇禎十五年題旌初知縣高承埏方在
圍城中悉其孝行兵退詳請旌表親詣其宅致

禮焉曰求忠臣必於孝子之門吾以勸忠也

萬大年邑庠生與敦復同時助守者也有至性
在圍城贊畫有功於風雪中往來策應爲士卒
先以勞勩卒高承埏爲文以祭承埏哭守陴者
皆哭

徐振奇邑諸生夙負意氣有膂力崇禎十六年
四月

大兵復來攻振奇奉委劄爲鄉勇守備十九日率壯
下禦於張頭窩鼓勇大呼突衝無前乃環圍力

竭陣亡高承埏灑淚奠之 贊曰芮大年徐振

奇二人舊志無之及檢高承埏行狀其事實乃
與敦復並列用急表而出之嗟嗟生丁陽九慷
慨捐軀豈得以匹夫匹婦之小諒忽之哉獨惜
丙子役死者更多而趙國鼎舉家徇難遂無後
人爲之立傳者致死事諸人竟不獲附傳也悲
夫

芮國大邑廩生昌齡子也明末時闖賊入京師
國大隨其父乘舟避難突遇兵國大恐父被執

冒鋒刃願以身代死之父因得免

按舊志有芮伯正者慷慨好義施學田百畝授義官又有王思恭王源王源王守道四人各捐已地增擴學圃基址而義民王瀛生員王有爲皆敦本尚義立義學延師訓鄉之子弟邑令獎之雖無他事實其行義不可沒也例得附書

國朝

芮維新邑庠生天性篤孝年十三父歿哀毀骨立事孀母張氏克盡子職家雖貧啜菽飲水恒盡其歡母年踰九旬不能食且艱步履維新旦夕視起居惟謹每進湯藥必親嘗之久歷寒暑

未嘗少衰順治間表其門

崔國祚字延齡貢生父早逝奉養後母極盡其誠家頗饒多侍兒然潔修澹奉盤匱不欲令他人代也母病移傍母榻旁跬步不離中夜聞呻吟立起及沒哀毀如禮邑人以爲難國祚性好書工數理每占輒奇中其讀史至篤行諸傳輒潛焉出涕以悲蓋天性然也康熙中表其門弟國祺字永齡亦以孝聞值邑中連大水以買地濟貧及災息仍還其券鄉人多德之

牛鏈字金臣康熙辛酉武舉三歲失怙母撫之
稍長至性過人每念母氏劬勞益自感奮遂登
賢書母故賢喜行善事鏈能先意承志得其歡
母沒廬墓三年中夜念及則噉然而哭親朋來
唁輒悲咽不能出聲邑人將以孝請旌鏈頓首
固謝之王盤峯曾有詩曰匍匐救顛危殷勤敦
舊故立身若太山輕動恐有誤慈訓何諄諄多
君憶朝暮事死如事生六十猶孺慕蓋實錄也
劉祚永邑庠生生母早卒事繼母一如所生母

病日宛轉床褥前達旦不寐母沒思慕不已於墓旁蓋一茅舍朝夕上食如生時泣拜極哀行路人無不傷感康熙二十二年旌表其曾孫達亦以孝名人謂孝子之後恒生孝子云

芮嘉瓚業儒天性醇篤父沒號慟欲絕廬墓於縣東門外祖塋側茹荼飲藥骨立如柴鄉黨族人勸之歸皆不聽後以母命召乃還然每念及輒奔趨墓所長跪而泣邑令旌焉

單應運字駿發邑庠生以行義著於鄉從弟碩

膚十歲而孤家貧無以自給應運憐之遷其母子於舍延師教課完其家室後碩膚遂領壬子鄉薦旌其母邵氏節無何碩膚又卒孤如金甫三歲兩世孀居仍依養於應運家至今同居無間應運子鑑至乾隆辛酉壬戌聯捷人以爲厚德報云

王居仁南沽莊居民世業農克敦孝友七世同居居仁祖母李氏善持家年九十餘矣目失明然家口百餘人事無大小必稟命一切耕穫所

收及貿易所入悉以白李貯之公家無私蓄男女皆知禮讓家長未衣食幼稚不敢先或問居仁曰翁何以得此答曰只教兒曹不背祖宗耳家有圃植杏棗諸果非成熟不采摘卽有風雨搖落者幼稚未嘗着口必掇拾奉李氏爲之分給其家法如此子若孫皆享大年長令過其間必式之 贊曰余聞南沽王氏家法輒嘖嘖焉興羨於仁里也雖史冊所稱如張公藝陳褒鄭湜諸賢何以過此翁哉翁世務農業未嘗讀書

而敦本尚質禮讓雍雍率斯道也風何爲不古
俗何爲不淳抑高宗封泰山公藝書忍字百餘
以進而居仁之言則曰不令子孫背祖宗有味
哉有味哉詩云無念爾祖書云乃祖乃父從與
享之其義較忍字爲更遠矣誰謂此翁非知書
者

廉隅

分辨之謂廉執守之謂隅記曰砥礪廉隅廉隅
者居身之所珍也有不爲而後可以有爲雖跡

類經經其人亦曷可少哉閱前令伍未刻志稿
內列廉隅科意甚善惜僅載數人姓名不註一
字蓋見舊志於名宦鄉賢諸大傳不過數語附
見者益宜畧焉耳然畧之則不必志之矣志之
則亦不得畧之矣予旣詳傳諸人物并核此數
人梗概著於篇

王懋言字簡之邑庠生容貌恂恂厚重簡默嘗
引躁人詞多語以戒學者謂言爲心聲其言剽
以浮其心必輕以肆是以君子慎之懋言見人

喞然如不能出口者人對之亦不覺意氣盡歛
劉同吉字君直邑增生明孝廉泰吉弟也蓬門
寂處日手一編嘗研硃註經有所見則以蠅頭
小楷標識其上旋復更定易稿者數矣他事皆
所勿問兄泰吉夙與王溥張奇勛相友善獨不
詳其死狀妻楊氏蓋死於丙子之難云

呂見蘭邑庠生闇然自修葛巾布袍不事粉飾
生平聚徒授書開示懇切總欲用心於內長吏
雖重其名未嘗一往謁日滅明非公事不至我

則何事之有

高晉爨初名進益字受之邑庠生潛心嗜學不求聞達無寒暑輒扃其戶戶旁留一小牖聞客呼自牖窺之非所契概以他往謝惟來講學者則親啓笑而入旣入扃戶如故

王師烈字方如國賓叔子師旦弟也天性醇篤少從父受書周旋進退未嘗少失父沒事兄如事師終身友愛不衰先師旦卒師旦常稱之曰方如和而能介不慕榮貴有顯宦議婚敬謝之

日吾諸生與卿大夫聯姻人或以語議我我何辭焉其品節高峻多類此

牛之潏字碧石康熙壬辰歲貢學優品潔尤邃於禮經嘗謂恭敬退讓樽節以明禮禮也者生人之大閑也戚屬有宦於京者延致之之潏從容議論多得大體然未嘗一語及世法人以此益推服焉

張應發字子仲邑廩生少孤事孀母撫幼弟三人以孝友聞居鄉且耕且讀足跡不入城市類

逃名者而端方之概訖爲士林所推年八十以
壽終子若孫亦能守其家法云

李鼎臣字公輔雍正丙午歲貢人品端潔視炎
熱場中人望望焉若將免已教人必先器識故
出其門者類知自好嘗自署於壁曰咄咄李生
無畝可履有舌可耕

牛楷字聖貽邑廩生賦性耿介家無擔石之儲
晏如也非其分雖一介弗取也邑縉紳咸樂與
交而楷顧落落自高耻稍有所諂屈不及貢而

卒人咸惜之

楊寅字大夏邑廩生天性狷介遇儕輩論文則喜稍涉利輒掩耳而走貧至無以餬口然或有投贈者謝曰楊生故不受人憐卽歲科試數與廩保事亦未嘗受一錢雍正七年當事重其品舉約正遇朔望宣

聖諭惟謹然當事之庭寅終歲不一至也竟以窮死聞者悲焉

流寓

名人學士踪跡之所經則草木山川若爲之生
色或在未遇之前或在宦成之後卽一宿再宿
而某年某月猶將標記焉以示勿忘况曾久棲
於此者乎邑之流寓自元前無聞焉則舊志踈
也今亦姑弗深考由明以來取其姓氏焯著者
系諸人物之末亦愈與是邦文獻相敷佐云

明

李永達字質夫通州人崇禎間曾爲張家灣守
備慷慨好義其姑隴夫周文譽貿易寶坻家焉

永達亦時至寶坻問訊其姑丙子兵燹文譽與
難李氏率子婦及女共六人俱投井死永達爲
斂葬於周氏祖塋道遇一被難童子問其年曰
十二問其里曰任邱問其姓曰李憐之攜養令
與己子同學尋送還其家其家餽酬却不受
李孔昭字光四薊州人性孤峭崇禎癸未成進
士見時事日非不赴廷對以所給牌坊銀留助
軍需遂去奉母隱於盤山甲申流賊陷都城聞
變將死之以老母在白衣冠哭田間者三載

大清定鼎求遺賢撫按交章薦以病堅謝不出一日
當道遣吏持書幣往遇負薪者呼問若識李進
士耶負薪者張目曰問李進士奚若吏具道意
乃以手遙指負薪去吏至其室虛矣訪之隣叟
曰若面失之向所見負薪者卽是也其後屢物
色之卒不得當道太息而已會寶坻劉繼寧方
擇師慕孔昭高義詣山中固請許焉然一念母
卽夜深必歸時黃冠時儒服衣着屢變人亦不
知爲李進士也時邑中方興役吏按戶派夫驅

孔昭孔昭曰我力不任願出資以代吏持去閱
數日杜大學士歸聞孔昭在邑急往候吏聞趨
謝罪孔昭曰此間豈有李進士耶若勿誤由是
踪跡愈不可必矣庚子正月孔昭爲弟子講孟
子盡心章畢曰此傳心法也又曰吾晚年愛陶
詩汝曹味之言訖而逝門人私謚曰安節先生
贊曰陶靖節之卒也史書晉處士若李先生
者其靖節之儔匹歟始登第卽歸隱其見固已
早矣及遭鼎革高蹈不顧南山之南北山之北

卒超然自脫於物色桃花源何必定在人世耶
生芻一束其人如玉當事欲繫維之不得而岑
寂海濱高賢下榻其爲此邦之光也抑多矣

吳可願字見素薊州籍以萬歷癸卯舉於鄉其
僑寓寶坻最久在邑中與王好善劉廷元廷魁
兄弟及王溥張奇勛輩聯文社同學咸推先之
不獨制義雄絕古文詞亦生峭屈盤自成一家
一時碑銘傳誌多出其手好善行狀亦可願筆
也

國朝

勵杜訥字近公其先由浙江遷靜海杜訥學問淵通尤善書法應博學宏詞科授編修累陞刑部侍郎正色立朝多所建白出入禁苑二十餘年恩禮優渥卒

賜諡文恪祭葬如例祀賢良祠豐功大業詳見國史不具載其未遇時嘗往來於寶坻者數年旅邸無聊臨池潑墨所在多有今縉紳家但得其片紙隻字珍若拱璧

王國賓字元洲會稽人九歲善屬文受學於同
郡陶石簣劉念臺兩先生讀書務窮理力行不
徒治章句自弱冠游庠後屢困棘闈乃束裝北
上游覽名山川交其賢士大夫大司馬李懋明
奇其才容之遂佐李公捍邊圉靖寇氛凡奏計
多出其手特薦授別駕以憂歸服闋除任豫章
未赴遇鼎革絕意進取

世祖章皇帝詔求遺賢宋中丞以國賓名上固辭不許
乃就寶坻教職邑自丙子復隍文廟傾圮國賓

倡邑人急修之學田沒於旗園力請乃得撥補
未幾固陳年老乞休遂家寶坻日惟與知己談
經賦詩蕭然物外或出所貯古墨舊硯獨坐摩
挲竟日不厭一夕忽招集故舊歡飲至夜分起
歌曰薄游天涯兮何所依身一出兮不可歸客
去卽盥櫛呼三子命以舊衣歛端坐而逝

毛際可字會侯遂安人登順治戊戌進士除彰
德府推官缺裁改知固城縣以憂去再補祥符
具有政聲會徵博學宏詞還任遂引歸一以詩

士文自娛淋漓頓挫自成一家晚以子士儀令
寶坻迎養至署乃裹糧遊盤山寄詩其友江陰
茲歛樵鵬有笑我扳輿來海國憶君把酒在江
臯句邑中諸名勝肩輿所至題詩始贊

曰浙中古文家同時有三毛之稱謂先生與稚
黃西河也稚黃縱橫西河博奧而會侯以汪洋
淡泊鼎峙其間才氣若稍遜者然其音較醇雅
矣會侯在子署曾作詩寄蔡嶽樵及子修志時
適延同學蔡芳三寅斗者秉筆乃嶽樵叔子也

因憶當日所寄詩蓋閱五十年於茲矣豈亦有
數焉存乎其間耶酒酣夜話爲抵掌太息者久
之

楊大年以字行漁陽詩人也遨遊山水間情往
興來蒼茫欲絕爲一時名流所咨賞朱秀水曰
下舊聞王新城古歡錄往往摘採之與邑人王
師旦稱莫逆數相過從曾跋其文曰莫云王風
衰莫爲霸氣使草木懼朽腐用爲沒世耻又謝
題蘅香草云送春月路逢知己憶夢泉臺泣曉

風皆名句也蘅香草葢六年詩集名

吳珍字石叟薊州人歲貢歷陞太康知縣嘗讀
書邑中與邑人苑瀛珮輩相倡和梵宮古蹟多
所題咏書法尤適逸羽流縉客乞其書無不應
者後邑人漸知貴重爭藏之間火神廟僅存一
額一聯愛者猶揭之而去

論曰扶輿之氣磅礴而鬱積不遽罄於一時故
遲之又久而益盛况畿東之地去天尺五者哉
自金迄明前志所載人物幾畧盡於上卷矣

國家百年中大化翔洽人才蔚生遂幾以一朝掩
歷代上唐虞之際於斯爲盛不其然乎詮次文
學政績者英孝義廉隅以及流寓凡七十餘人
本朝居三之二然則自茲以往際重熙累洽而益
自激昂咏世德之駿烈追前人之清芬其聯翩
競爽者又將大書特書不一書也夫

人物下卷之十二終